



WANTOK

Niuspepa bilong yumi ol PNG stret!

Wan Wik,

Disemba 2 - 8, 2004

NAMBA 1585

K1 tasol

Great Quality

Affordable Price



OL PIKININI NA OL SUMATIN! ALARING KOMPETISEN I stap insait!

Dispela Kompetisen bai go pas wantaim INTERNATIONAL CHILDREN'S DAY 2004

Gutpela ol prais long winim!!

Kolis i no inap kisim gret 10 moa

p3

Skul fi bai wankain long 2005

Desney Koimo i raitim

Nesenel Edukesen Bod (NEB) i harim pinis krai bilong ol papamama na bai lukim skul fi bilong 2005 i stap long wankain olsem dispela.

NEB i putim dispela bilong mekim rot long ol Provinsel Edukesen atoriti na Edukesen Dipatmen long kamapim gut mak bilong stretpela skul fi bilong ol skul pikinini long neks yia. Dispela bai lukim skul fi bilong gret 7 na 8 i kam daun bikos Nesenel Edukesen Sistem i luksave olsem ol i kam aninit long praimer skul level.

Ol Nesenel na Provinsel skul bai lukim dispela i kamap aninit long Provinsel Edukesen Ekt (Lo) we i no kam insait o i no kamap yet. Skul fi bilong elementari na praimer bai stap namel long K100 na K200. Em long elementri prep i go inap long gred 8. Skul fi bilong ol vokesenel na sekenderi skul bai i stap namel long K1000 na K1500. Em long gret 10 i go long gret 12 na ol vokesenel skul. Teknikel trening skul na Bisnis Kolis em klostu long K4000 na ol tisa Kolis bai K1200.

Skul na ol Kolis i laikim dispela mani long wok bilong ol long ranim gut tasol tasol ol papamama na Gavman i mas i gat inap mani long baim skul fi. Dispela 2005 Maximum Fee Policy i bilong lukim olsem Nesenel na

Provinsel Gavman wantaim ol papamama i wok bung wantaim long baim skul fi bilong ol pikinini.

NEB mak bilong skul fi bilong wanwan level bilong edukesen i hap mani we sumatin i mas baim long mekim inap baset bilong skul long ron gut long wanpela skul yia olgeta. Ol papamama bai baim yet bod fi we wanwan skul bai i sasim long mak bilong kamapim sabsidi mani i kam insait long skul.

Nesenel Edukesen Bod tu i bai senisim rot ol i save makim ol gret 10 sumatin long i go mekim gret 11 long ol Sekenderi na Nesenel Hai Skul insait long kantri.

Siaman bilong NEB Peter Baki i tok ol bai makim ol sumatin tru long wanpela komiti we bilong ol hetmasta bilong skul husat i save kisim ol gret 11.

Wanpela opisa bilong Sekenderi Edukesen na Open Lening seksen bai go pas long dispela komiti.

Sumatin we ol makim bai kism tok orait long Nesenel Edukesen Bod insait long Seketeri bilong Edukesen olsem siaman.

Dispela komiti bai kisim nem bilong ol sumatin husat i mekim gut gret 10 eksam o tes bilong em bihainim skul liva fom sumatin i makim olsem NHS Gret 11 olsem namba wan. Ol bai lukluk tu long ripot bilong sumatin insait long skul.



Amamas long opim nupela Polis stesin: Ol meri Bogenvil i amamas long opim nupela Polis stesin long las wik. Foto: Aloisius Laukai

KLINA Orange



WOL AIDS DE

Disemba 1, 2004



• Faith Based Group Em i wanpela NGO sios grup i save pait egensim HIV/AIDS i bin stap tu long mas na makim Wol AIDS De long Sir John Guise Stadium aste. Long olgeta hap bilong PNG na wol, ol amamas i bin kamap long luksave long dispela de na sik we nau i wok long kilim planti pipel tru long wol.

Ol meri PNG karim hevi bilong sik AIDS

OL MERI bilong Papua Niugini nau i wok long karim hevi bilong sik HIV/AIDS.

Na nau em i taim bilong ol man bilong PNG long luksave long dispela bikpela hevi na helpim ol meri long banisim ol yet long dispela sik nogut.

Dispela em i toktok na singaut bilong Dairekta bilong Nesenel AIDS Kaunsol, Dokta Ninkama Moya long makim Wol AIDS De we i kamap long Trinde, Disemba 1.

"HIV/AIDS i wok long daunim laip bilong planti meri na dispela inap long bagarapim bihain taim bilong Papua Niugini. Long planti komyuniti long wol ol meri i no inap long kisim gutpela edukesen na ol toksave long ol kain kain helt samting olsem sik AIDS na STI. Planti meri i no save go kisim sekap long ol STI klinik

bilong wanem ol i save sem long go kisim halivim long ol helt opisa," Dokta Moya i tok.

Narapela hevi em i autim em hevi we ol meri i save bungim taim ol i no inap long askim man bilong ol long banisim ol yet long taim bilong slip wantaim.

"Long kastam bilong PNG, we ol man em ol bos na meri i nogat sans long toktok, dispela i save kamap," Dokta Moya i tok.

Em i tokaut olsem ol namba i kam inap long mun Jun long dispela yia i soim olsem namba bilong ol meri i karim dispela AIDS binatang inap long 4591 we i hap bilong ol namba namel long 20 na 29 krismas. I gat 755 meri namel long 20 na 24 krismas. Dispela namba em i 410 moa long namba bilong ol man long dispela grup.

Dokta Moya i tok ol namba i soim olsem planti moa yangpela meri i wok long slip wantaim ol man i gat moa krismas long ol.

Em i tok dispela yia i gat wanpela askim tasol bilong ol meri, na dispela em ol i mas luksave olsem ol em ol mama bilong tumora na ol i mas was gut na banisim ol yet long dispela binatang bilong wanem ol bai karim ol pikinini manmeri husat bai kamap ol lida bilong dispela kantri long bihain taim.

"Ol meri i mas save long ol samting we i ken banisim ol long dispela HIV binatang we i save kamapim AIDS.

Olsem na ol meri i mas go pas long ol AIDS edukese progrem. Dispela hevi bilong AIDS i no inap go daun inap mipela i strongim sindaun bilong ol meri.

Salens long lukautim bodi na pas wantaim wanpela tasol

Veronica Hatutasi i raitim

SALENS i go aut long olgeta pipel long kantri long lukautim bodi bilong ol na noken slip wantaim narapela taim ol i no marit na tu, pas wantaim wanpela patna tasol.

Ledi Kaludia Matane i bin wokim dispela toktok long selebresen bilong

Wol AIDS De i bin kamap aste Trinde Disemba 1 long Sir John Guise Stadium long Pot Mosbi.

Long wankain taim tu, em bin tok long pipel insait long kantri, gavman, ol sios, ol praivet kampani na ol Non Gavman grup long putim han wantaim na pait long daunim HIV/AIDS we i wok long bagarapim planti manmeri na moa yet, ol yangpela insait long kantri.

"Dispela sik i kamap long olgeta pipel maski ol i bikman, ol i rabisman, ol i yangpela o lapun. Planti yangpela i wok long dai long HIV/AIDS. Mak bilong pipel i dai long HIV/AIDS tude em 42 milien. Na dispela i winim mak bilong pipel i dai long tupela bikpela pait long wol. Pait egensim HIV/AIDS i bikpela na mipela i mas helpim gavman, Nesenel AIDS Kaunsil na ol arapela grup long dispela pait bilong daunim sik ya na i noken kalap i go long planti manmeri moa," Ledi Kaludia i tok.

Het tok bilong dispela de em "Women, Girls and HIV" o long Tok Pisin, Ol meri, ol yangpela pikinini meri na HIV.

Bikos HIV/AIDS i wok long kalap olsem wailpaia na bagarapim planti yut na yangpela pipel, Ledi Kaludia i tok ol famili i mas toktok long dispela sik na olge-



• Ledi Kaludia Matane wantaim Margaret Loko i sekan long bung bilong makim Wol AIDS De aste. Ledi Kaludia i tromoi tok salens long noken slip nabaut ausait long marit na tu, stap pas wantaim wanpela patna tasol. Mis Loko i toktok strong long givim wankain sans long edukesen long ol meri na ol i ken i gat save long mekim ol gutpela disisen long laip bilong ol we i karamapim tu HIV/AIDS. Mak bilong ol meri i kisim HIV/AIDS i winim ol man. Piksa: Veronica Hatutasi

ta bai save long rot we manmeri i kisim dispela sik na ol i ken abrusim.

"Yumi mas mas autim toktok long AIDS insait long famili, hauslain, komyuniti na ol grup yumi stap long en. Dispela em long stopim

sik long kalap long planti manmeri moa. Long wankain taim tu, yumi mas luksave long ol dispela wantaim sik na helpim ol long stap gut," Ledi Kaludia i tok.

Em i tok sampela narapela kantri i wok

long winim pait egensim sik ya bikos ol i bihainim tripela rot i kam aninit long ABC na mipela long PNG i ken bihainim tu. Mining bilong tripela leta em A i sanap long Abstain o noken slip wantaim wanpela nara-

pela inap ol i marit, B - Be Faithful o pas wantaim wanpela patna o sapos yu marit, pas long wanpela man bilong yu tasol na C-Condom o yusim karamap bilong sem. Em i tok tu olsem ol manmeri i noken ting olsem karamap bilong sem i ken banis olgeta long dispela sik.

Em bin tok tu long givim wankain rait na sans long ol meri na yangpela pikinini meri na ol i ken sanap strong long pait egensim HIV/AIDS. Dispela em bikos mak bilong ol meri i gat HIV/AIDS i winim mak bilong ol man.

Long wankain taim tu, Margaret Loko, wanpela strongpela meri lida long Nesenel Kapitel Distrik na kantri i bin tok strong long ol atoriti na ol mama long skuim ol pikinini meri long ol i ken mekim ol gutpela disisen long laip. Em bin askim strong ol man long luk-

save long rait bilong ol meri.

"Mak bilong 50 pesen long ol meri long wol i gat HIV/AIDS. Yumi long PNG i wokim wanem long dispela? Yumi olsem ol mama bai givim gutpela skul long ol pikinini meri na ol bai wokim gutpela disisen long laip bilong ol? Moa yet long prenpasin na pasin bilong manmeri i slip wantaim. Dispela em yumi kolim long rilesensip na dispela em wanem samting yumi save wokim long bodi bilong yumi. Na sapos dispela skul na save i no go long ol pikinini meri, PNG bai bagarap.

Em i no bikpela disisen long ol man long mekim sapos meri i tok nogat long slip wantaim em. Em i rait bilong meri sapos em i tok nogat bikos skin i les long planti wok na tu em i laikim spes long karim pikinini. Man i mas givim luksave.

Observing World Aids Day

Proudly supported by all
Johnston's Pharmacy outlets nationwide



JOHNSON'S PHARMACIES
Serving Papua New Guinea For over 51 years
and still the best!

Kolis no inap kisim gret 10 skul liva

Desnie Koimo i raitim

Ol bikpela skul insait long kantri bai lukluk nau long kisim ol gret 12 sumatin long go het wantaim skul bilong ol.

Dispela bai i lukim olsem olgeta gret 10 sumatin i mas pinisim gret 12 long go long bikpela skul. Long wanpela polisi we Komisen bilong Haia Edukesen i putim aut i toksave olsem ol bai stop nau long makim ol gret 10 skul liva i go insait long stadi o tren long ol bikpela skul. Dispela i kamap biainim wanpela Edukesen Rifom bilong 1993 we Dipatmen bilong Edukesen i taik lukim olgeta Provinsel Hai Skul i kamap Sekenderi skul na bai kisim planti ol gret 11 na 12 insait long kantri.

Stat long neks yia 2005 bai i lukim ol i makim ol gret 12 tasol i go long ol kain skul olsem tisa kolis, teknikel, nesing na ol arapela kolis we bipo ol i save kisim ol gret 10.

Dispela i kamap bikos bikpela namba bilong ol gret 12 i wok long pinisim skul long wanwan yia we 50 pesen o hap tasol i save go long bikpela skul na arapela hap i save stap nating. Narapela samting tu em planti bilong dispela ol bikpela skul ol i bin mekim long bipo taim olsem 1960 na 1970 na i no gat inap spes namba bilong ol manmeri insait long kantri i wok long gro bikpela na i lukim planti pikinini i go long skul.

Nupela polisi bai lukim olsem i nogat gret 10 skul liva we olgeta husat i pinisim gret 8 na

i go het long wokim gret 9 bai i no inap wokim gret 10 eksem tasol bai skul yet i go inap long gret 12.

Ol drop aut bilong gret 8 i ken go het wantaim skul bilong ol long mekim CODE o go skul Vokesenel na ol arapela privat trening skul. Wok nau i stap long ol papamama long lukim ol pikinini i mas pinisim gret 12 edukesen bilong ol bihain long ol i ken go long ol kolis.

Komisen bilong Haia Edukesen i putim aut dispela toksave bikos papamama i mas plerim gut edukesen bilong pikinini long narapela 12pela yia long taim pikinini i statim edukesen bilong em inap long taim em i redi long go long kolis o yunivesiti.



Gutpela long lukim sampela grup bilong ol man i sapotim dispela kempen bilong noken paitim o birua long ol meri we i bin kamap long las wik Fonde. Las wik Fonde em bikpela de insait long wol long tingim na makim dispela kain hevi ol meri i save stap insait long en. Planti taim yumi save harim papa i paitim mama o ol man i mekim nabaut long ol meri. Olsem na dispela pasin i mas senis nau. Ol dispela lain man i soim gutpela save na tingting bilong man. Amamas long yupela.

Tablet marasin na bia i no save wok gut. Ating tupela i save birua nogut tru ya. Sapos yu man bilong holim wan botoi, yu mas wet pastaim na larim marasin bilong skin pen o het pen i pinisim wok bilong em gut pastaim long bodi. Marasin i bin kikim tru wanpela poroman pinis long dispela kain pasin. Tablet na SP i salens gut tru na pulim baga ya i go hap hap na poro ya i lusim graun na win i karim em i go.

Sapos yu laik ron long balus nau i go long ol ples long krismas, ating bai yu traim hat liklik. Wanpela poro i traim hat tru long kisim sit i go long Lae long wiken na spes i pulap olgeta. Ating em bai traim yet i go inap Jenuari ya. Olsem na mipela i tok, mekim bukim bilong yu pastaim long mun Septemba na Oktoba yet na baim tiket. Em toksave mipela save tokim em tasol em i save tok, bai i gat wei. Koan, yu kisim.

Taim yu askim ol pikinini long prea long kaikai, moabeta yu noken opim ai na lukluk bikos ol i ken pilim husat i no pasim ai na lukluk i stap. Wanpela pikinini i prea gut pinis na bihain i kros nogut long bikpela brata i no pasim ai taim em i prea. Em i tok, mi pinis long prea bikos yupela i no respektim prea bilong mi. Bai mi kotim yu long Jisas.

Ol PNG man tok nogat long paitim meri.

Long Novemba 25 i go long Disemba 10 olgeta manmeri long wol bai kamapim bikpela wokabaut mas long stopim pasin bilong paitim ol meri.

Olsem na planti ogenesesen na grup husat bai go pas long ol dispela wokabaut insait long dispela 16 de i tok dispela yia ol bai wokim ol kalsarel samting na tok strong olsem em i tambu long man i paitim meri.

Kalsa i no isi long luksave, tasol em i gutpela bikos kalsa i save senis olgeta taim. Ol man i save kisim biknem long ol wok na bisnis insait long Papua Niugini bikos ol i save sapotim bilip na pasin we i kamapim birua long ol meri.

Namba wan toktok bilong dispela yia kempen em long tok inglis i tok "PNG MEN AND YOUTH SAY NO TO VIOLENCE". Long tok pisin bai yumi tok 'PNG man na yut i tok tambu long paitim meri'.

Dispela ol samting bai kamap i bikpela bikos Novemba 25 em Intanesenel de bilong tok nogat long paitim ol meri na Disemba 10 em Intanesenel Yumen Raits De.

Wanpela non govaman ogenesesen ol i kolim Consultative Implementation and Monitoring Council (CIMC) wantaim Family Sexual Violence Action committee i bin ogenesim wanpela wokabaut mas long Sir

Yusim ICT long wok

Neville Choi i raitim

WOK developmen insait long Papua Niugini nau bai i kisim helpim long ol Infomesen na Komyunikesen Teknoloji (ICT) o kain kain masin bihain long Nesanel Gavman i luksave long strong bilong ol dispela masin na putim i go insait long Midium Tem Developmen plen bilong en i go inap 2010.

Minista bilong Stet Enteprais na Infomesen, Dokta Puka Temu i tokaut olsem gavman i luksave long strong bilong ICT insait long wok developmen na em bai i go pas long strongim ol dispela kain masin bai sevis ol i save kamapim i ken i go daun long ol manmeri i stap long ples.

Dokta Temu i bin tokaut long dispela las wik Tunde taim em i opim tripela de woksop long Pot Mosbi we i lukim ol mausman bilong gavman, ol Non Gavman Ogenaisesen (NGO) na praivet sekta i paitim toktok long strong bilong ICT insait long PNG na bungim tingting bilong kamapim wanpela nesanel ICT polisi we gavman bai i bihainim long strongim wok bilong ICT insait long wok developmen.

Dispela bung em Yunaitet Nesens Diveropmen Program (UNDP) i bin kamapim wantaim gavman.

Ol i bin kisim tupela saveman bilong ICT long Fiji na Solomon Ailans long kam givim tok stia long dispela woksop.

Bikpela hevi nau i stap em planti samting we ol ICT samting i ken kamapim i no kamap.

Seketeri bilong Dipatmen bilong Stet Enteprais na Infomesen, Henao Iduhu i tok bipo i no bin i gat inap luksave i go long strong bilong ol ICT masin long wok developmen.

Tasol bihain long gavman bilong Praitim Minista Sir Michael Somare i bin senisim opis bilong Infomesen i go kamap wanpela dipatmen, ol i kamapim Gavamani Sivirai, niuspapa bilong gavman we i save kamaut long National na Wantok Niuspepa yet long olgeta mun.

Mista Iduhu i tok dispela nau i soim laik bilong gavman long luksave long strong bilong



• Ol manmeri i sindaun long woksop las wik long skelim strong bilong ICT insait long wok divelomen. Foto: Dirk Wagnener UNDP

ICT na helpim ol i ken givim long karim divelopmen i go daun long ol ples.

Dispela woksop las wik i bin kisim tingting bilong olgeta laik insait long gavman na praivet sekta tu long ol samting we gavman i ken givim luksave long en long bihain taim.

Em i tok amamas long ICT nau i stap insait long Midium Tem Diveropmen Plen bilong gavman i go inap long 5-pela yia antap. Nau gavman bai i sindaun na traim

kamapim wanpela nupela Nesanel ICT Polisi we i ken strongim wok bung namel long olgeta lain husat i save mekim wok developmen, na givim helpim na skul long ol manmeri long ples.

Em i tok PNG i wok long stap baksait yet long ol arapela kantri wantaim ICT divelopmen, na nau luksave i kam long gavman, bai kantri i ken kisim moa save na helpim long ICT.



TORO WANTAIM 3-PELA PORO GO PAINIM WOK LONG TAUN...

OL BOIS... YUMI GO PAINIM WOK NA POTNAIT BAI YUMI SPAK!

YU TU GUD YU AH!

OL I GO KAMAP LONG WANPELA BIKPELA OPIS NA TORO TOKIM 3-PELA PORO LONG WET AUTSAIT...

YUPELA WET LONG AUTSAIT.. MI GO TOKTOK WANTAIM BOSS!

MI TASOL SAVE LONG TOK INGLIS!

NAU TORO GO LUKIM BOSS BILONG KAMPANI...

ER.. BOSS MI-PELA LUKING FOR JOB...

UAM.. WHAT FOR?!

TORO EM PAOL LONG TOKTOK BILONG BOSS... EM TING BOSS I ASKIM LONG 4-PELA MAN LONG STAT WOK...

NO, 3 AUTSAIT! !?!

GET OUT!

Hap Hap Nius

NIP kros i go yet

OL pablik seven long Nu Ailan husat i bin kisim sas bilong paulim mani bilong provinsel gavman na Nesanel na Kavieng Distrik kot i bin rausim kot bilong ol nau bai inap go long Pablik Prosekyuta long sekim ol sas bilong ol na salim i go long Nesanel Kot.

Nesanel na Kavieng Distrik Kot i bin sindaun long dispela kot bilong 7-pela pablik seven i stat long mun Julai long dispela yia.

Ol sas long ol dispela pablik seven i bin kamap long sampela sut toktok i kamap olsem ol i paulim mani, na traim long stilim mani long gavman.

Lainim tok ples Siapan

OL MANMERI insait long Is Nu Briten nau bai inap long lainim tok ples Siapan long Redio Is Nu Briten (RENB).

Wanpela redio program long tok ples Siapan bai i kamap klostu long RENB.

Yasuo Komori, wanpela volantia wantaim Japan Overseas Cooperation Volunteers i wok wantaim RENB i bin kamapim dispela program.

Komori i tok dispela program bai i helpim ol tua gait long Rabaul long harim na tok tok gut wantaim ol turis i kam long Japan.

Dispela skul bilong tok ples Siapan bai i stat bipo Krismas long dispela yia.

Nu Ailan lusim biknem lida

GAVANA bilong Nu Ailan provins, lan Ling-Stuckey i salim bikpela tok sori bilong em i go long famili bilong Walla Guguk, wanpela biknem lida bilong Nu Ailan long bipo.

Leit Mista Guguk em bilong Meteran ples long Nu Hanova.

Em i bin skul long Ranmelek Methodis Misin Skul na i bin skruim skul bilong em long Vunairima Methodis Misin Skul long Is Nu Briten. Skul bilong em i bin pinis taim ol Siapan i bin kisim em long pait long woa.

Bihain em i ronawe go long Buna na go pait wantaim ami bilong Australia, Inglan na Amerika. Ol i bin salim em i go long Indroopilly long Brisbane. Em i kisim luksave long strongpela pait bilong em long woa taim em i wok olsem skaut na kos watsa taim pait i go kamap long Nissan ailan long Bogenvil.

Leit Mista Guguk i bin namba wan man Lavongai long kamap nesanel politisen.

Em i bin Presiden bilong Lavongai Lokol Gavman Kaunsol long namel long 1960 i go inap long stat bilong 1977. Ol arapela wok em i holim em wanpela opisa bilong Nu Allan Native Society

Asosiesen (NINSA) bihain long Seken Wol Woa i pinis.

Em i bin go pas long kamapim Tutukuvul Isukal Asosiesen (TIA), wanpela kopretiv asosiesen we i bin kamap long strongim wok ikononik na politiks bilong ol. Saut Lavongai pipel namel long 1960s.

"Long makim maus bilong Nu Ailan Provinsel Gavman na ol pipel bilong Nu Ailan, mipela i salim bikpela tok sori i go long famili bilong Leit Guguk na karim sore bilong ol long dispela taim," Mista Ling-Stuckey i tok.

Em i singaut long ol arapela komyuniti lida long bihainim driman bilong leit Guguk long strongim developmen na ikononik stability bai tupela i stap long wanpela mak tasol.

Presiden bilong Lavongai Lokol Level Gavman na Siaman bilong Sosol Sevises insait long Nu Ailan provinsel gavman, Akim Lailai i mekim bikpela tok sori long dai bilong Leit Mista Guguk.

Leit Mista Guguk, wanpela as ples Lavongai man i bin indai long haus bilong em long Saut Lavongai long bondei bilong em long Mande, Novemba 22.

Em i bin 82 krismas.

Siaman Lailai i tok Mista Guguk i bin wanpela long ol lida long Nu Ailan husat i bin tok-tok strong long developmen long Nu Hanova ailan na long sanapim Lavongai Lokol Level Gavman aninit long kolonial edministresen i go inap long taim kantri i kisim independens.

Mista Lailai i tok Mista Guguk i bin soim lidasip na em i bin winim sit bilong Kavieng Open na kamap wanpela memba bilong palamen long 1977.

Em i tok Mista Guguk i bin wanpela man husat i gat bikpela driman na wok bilong em i bin sanap antap long ikononik developmen bilong Nu Hanova we em i bin bilip olsem agrikalsa bai inap long strongim dispela wok developmen.

Mista Lailai i singaut long olgeta pipel bilong Nu Hanova long skruim ol tingting bilong Leit Mista Guguk long kamapim wanpela strongpela ikononik antap long wok agrikalsa.

Mista Lailai i salim tok sori bilong em i go long 11-pela pikinini na 21 tumbuna bilong Leit Guguk na tok olsem ol i lusim gutpela papa na tumbuna man.



Bana stap wantaim hevi...

DISPELA piksa i soim wanpela domitori o haus bilong ol manki sumatin long Bana Provinsel Hai Skul we i bruk nabaut na ol sumatin i stap long hevi. Bana Hai skul i stap long Nagovis eria long Saut Bogenvil. Planti klasrum na ples bilong silip bilong ol sumatin i wok long bagarap i stap tasol ol tisa na wok manmeri bilong skul wantaim ol sumatin i wok long hat wok long lukautim ol yet. Nogat wanpela halivim i kam long memba bilong ol. Lukim moa stori bilong Bana Hai Skul long neks wik Wantok we ripota bilong Wantok Niuspepa long Bogenvil, Aloysius Laukai bai stori moa long en.

ENB gavman kisim 5-pela bikpela projek

IS NU BRITEN provinsel gavman nau i kisim 5-pela projek long menesim insait long provins.

Dispela 5-pela projek em Gazelle Restoresen Atoriti (GRA) i bin kamapim long mak bilong K6 milien.

Ol projek em ol banis bilong graun i bruk, rausim bilong ol pipia diwai na ol arapela pipia samting, katim gras insait long Rabaul taun eria, lukautim bilong rais mil masin long Sinivit Lokol Level Gavman na ol rot appred program long Vunapalading/Kereba insait long Gazelle Peninsula.

Nau GRA i givim ol dispela projek i go long ENB provinsel edministresen, gavman nau i mas wok long lukautim, menesim na kisim bek samting olsem K3,850,363.

Ol dispela projek i karamapim ol haus samting we i bin bagarap taim maunten paia i bin pairap long 1994.

Wok long ol dispela projek i bin stat long mun Ogas 2003 na i bin pinis long mun Mei long dispela yia.

Bikpela projek namel long dispela 5-pela em projek bilong stopim graun i bruk we inapim K1,359,042.20. Dispela projek em bilong stopim graun long sait bilong ol maunten paia long bruk na go insait long Rabaul taun.

Olgeta dispela projek i bin kisim mani long Wol Benk, Asian Development Bank na European Union wantaim 10 pesen hap i kam long Nesanel Gavman.

Arawa polis stesen redi nau

WOK long polis stesen long Arawa taun long Bogenvil bai i pinis long Disemba 23.

Bihain long en, bai ol polis manmeri bilong Australia na Bogenvil yet bai i ken yusim long strongim wok lo na oda insait long provins.

Arawa Kapentri na Trening Senta i wok long karimaut wok stretim long polis stesen.

Dispela wok stretim inap long mak bilong K314,000 na bai i lukim ol i sanapim wanpela komyuniti hol, wan-

pela 2-stori blok, ples bilong putim ol gan, wanpela polis duti stesen na ol sel bilong kalabusim ol man nogut.

Arawa Kapentri na Trening senta i bin kamap aninit long halivim i kam long New Zealand gavman. As tingting long sanapim dispela senta em long halivim ol pait man bilong Bogenvil long kisim save long wok kapenta.

Dispela polis stesen projek i kam aninit long enhens koporesen program long Bogenvil.

Utu Hai Skul bai kisim gred 11 neks yia

UTU Provinsel Hai Skul long Nu Ailan provins bai stat long kisim ol sumatin bilong mekim Gred 11 stat long neks yia.

Dispela i kamap bihain long i gat planti gred 10 sumatin insait long provins husat i wok long kisim gutpela mak.

Nu Ailan provinsel gavman i bin luksave long dispela na givim tok orait long Utu i statim gred 11 long neks yia.

Gavana bilong Nu Ailan, lan Ling-Stuckey i tok Provinsel Eksekyutiv

Kaunsol i bin tok oraitim mani bilong go long strongim ol skul samting long Utu Hai Skul long dispela yia bai i ken redi long neks yia.

Taim em i tok orait long dispela halivim mani, Mista Ling-Stuckey i tok olsem wok bai i go het long sanapim wanpela laborator bilong lainim Physics, Chemistry, Biology, wanpela Sains laboratory, wanpela bilong komputa, tupela dabol klasrum wanpela domitori o ples bilong slip na 4-pela nupela haus bilong ol tisa.



Ol asples i lusim Manam ailan

PROVINSEL Gavman bilong Madang i wok hat tru long traim muvim ol manmeri bilong Manam ailan husat i kisim bagarap long volkenu long go long narapela hap bikos maunten paia i wok long tro-moi das na smok i kam daun yet.

Siaman bilong Red Cross opis long Madang James Dagen i tok ol wok i hevi yet bikos ol gavman atoriti i wok hat yet long traim kisim ol manmeri i go long putim long narapela hap.

O pipel bilong Kuluguama i singaut strong long ol i laik lusim hap ol i stap long en long pinis bilong dispela wik.

Ol pipel bilong Boda i bin kirap go pinis long Baliu na Dangale ples long abrusim dispela bagarap bilong maunten paia tasol i gat bikpela kem bilong ol manmeri i lusim ples bilong ol na i stap nau long Abaria, Dangale na Gulei ples, Mista Dagen i tok.

Em i tok opis bilong Provinsel Disasta Komiti i no luksave yet

long dispela hap ol pipel i stap long en olsem em kea senta yet inap ol i pinisim gut toktok wantaim ol lidaman bilong ol dispela ples pastaim long dispela wik.

Mista Dagen i tok ol i no klia yet long amas manmeri tru i bin lusim ples bilong ol na i go sindaun long ol dispela hap tasol ol opisa husat i wok long karimaut ol wok bilong stretim sindaun bilong ol ples lain bai kamapim moa ripot long dispela bihain.

I gat ripot tu olsem ol pipel i kisim taim long gutpela wara bilong dring, kaikai na sel bilong mekim haus long slip.

Olsem na Red Cross i yusim pinis olgeta 20 lita dram bilong kisim wara na i laikim planti moa dram bilong pulim wara long givim long ol pipel.

Mista Dagen i tok RD Tuna tin pis kampani long Madang i givim ol tin pis long ol i tilim tu long ol manmeri i stap long hevi.

Em i tok tu olsem i gat luksave olsem sampela manmeri i wok

long kisim sik o hevi long pulim win na tu long dring wara ino klin na dispela sik inap kamap bikpela long sampela taim bihain.

Em i singaut tu long ol lain husat i save mekim wankain wok olsem ol long givim helpim wantaim dram o tang bilong pulapim wara, ol kaikai na ol pam bilong pulim wara na sel bilong wokim haus.

Ol dispela samting em i bikpela hevi nau long sait bilong ol na helpim i mas kam long sapotim ol, em i tok.

Lukautim ol mama i kamap gutpela moa

WANPELA liklik ples insait long Madang provins i statim wanpela projek we bai lukluk long stopim indai i save kamap long ol mama.

Dispela projek em ol lain long ples Butelgud insait long Not Amberog Lokol Level Gavman i putim bilong sevim laip bilong planti ol nupela liklik bebi na mama bilong ol.

Projek i lukim ol i mekim wanpela haus karim we bai lukautim ol mama wantaim ol bebi bilong ol na bai op long ol lain long narapela ples i stap klostu long kam na yusim tu.

Maus meri bilong Kantri Wimen's Asosiesen Sandy Genteli i askim ol ples lain long lukautim gut dispela haus.

Ol i wokim dispela haus long ol samting bilong bus na dispela i namba tu haus nau ol i makim insait long Madang Provins we bai lukluk long ol mama husat i gat bel tasol i nogat wei long go long haus sik insait long provins. Ol Viles Helt Voluntia bai i go raun long dispela ol haus long lukluk long ol mama.

Dispela haus i gat tripela rum we wanpela i opis, arapela em rum bilong karim na narapela em rum bilong wet we i gat narapela tupela bet i stap. Kantri Wimen's Asosiesen i givim pinis K1000 i go long ol i ken putim flo na baim ol arapela samting.

Sios kaunsela askim Kabwum memba long tok

Wanpela sios kaunsel bilong Ukata long Kabwum distrik long Morobe provins i tokaut olsem ol gavman na politik i mas stap long we long menesmen na edminstresen bilong sios.

Emasang Ematauke ELC PNG sios kaunsel husat i makim Ukata i tokaut olsem ol tok pait we memba bilong Kabwum Bob Dadae i mekim long askim Distrik presiden bilong Ukata distrik John Bata long risain em i no stret olgeta.

Wok bilong sios em samting bilong sios na lida bilong sios em bilip manmeri i save makim. Ol wanbel na makim na ol wanbel na senisim long bung iblong sios tasol. Olsem tasol plen na disisen na wok bilong ranim sios lida i save bihainim wanbel bilong bilip manmeri long sios na mekim. I no bihainim laik bilong wanpela man, mani, kago na long kisim biknem long graun, Mista Ematauke itok.


Mista Ematauke i tok moa olsem Dengondo

ples bai i no inap lukautim bikpela sinod bilong 2006. Tingting bilong sinot i kamap long Dengondo ples em long rot bilong bihainim laik bilong wanpela man, mani, kago na long kisim biknem tasol long raun.

Em i tok Mista Dadae em lida bilong gavman na em i memba bilong Kabwum tasol. Reveren John Bata em lida bilong sios na Ukata distrik i karamapim hap Tewae Ssassi, hap Raikos na Kabwum distrik. Olsem na sinod i kamap long Wasu hais skul em namel ples.

Bihainim wanbel wokmak bilong sios na i no long laik bilong wanpela man o mani na kago samting.

Em i tok tu olsem bung bilong Distrik Kaunsel long Galop long Oktoba na bilong Nesenel sios kaunsel long Novemba 2004 i wanbel olgeta long lusim Dengondo na strongim Wasu hai skul long lukautim 2006 sinod.



Em ol poto bilong soim kainkain samting yu ken mekim wantaim mambu. Yu ken salim ol dispela samting na kisim gutpela mani tu long ol samting yu mekim.

POTO MICHAEL NOVINGU

Salens long Is Sepik Gavana i kamap gen

MEMBA bilong Ambunti Drekkia Tony Aimo i kisim narapela kot eksen gen long stopim kaunsel presiden Henry Airo long noken mekim wok olsem Gavana bilong Is Sepik provins.

Mista Aimo i putim kot pepa long Waigani Nesenel Kot long las wik bihain long Mista Airo i no bin bihainim tok bilong Minista bilong Inta Gavman Rilesens Sir Peter Barter long em i mas lusim dispela sia bai wanpela nesenel memba i mas kisim.

I gat luksave olsem Sir Peter Barter i bin salim pas long mun Okotoba na namba tu taim gen long mun Novemba long Mista Airo i lusim sia tasol dispela samting ino kamap we Mista Aimo i go het long dispela kot eksen.

I bin gat wanpela pasin Mista Aimo i bin kamapim long las mun we em i bin kamapim wanpela kot oda long Stopim olgeta pasbuk bilong Is Sepik provin-sel akaun. Dispela i bin kamapim sampela hevi long wok na ron bilong provinsal gavman inap wanbel ibin kamap long sampela rot na ol benk i opim gen pasbuk bilong Is Sepik provin-sal gavman.



EASIPAY BAI I KAM LONG ENB

PNG Power Ltd i gat gutpela nius bilong ol pablik insait long East New Britain Provins.

Yupela bai kisim Easipay mita bilong ilektrisiti oa pawa long nupela yia. Toksave bilong wanem taim stret bai Easipay mita i kamap long East New Britain bai kamap klostu long ol niuspepa, redio na televisen. Easipay Mita em i wanpela system we yu bai baim ol unit pawa long yusim.

Easipay i gutpela long wanem:

- Kos bilong baim pawa i liklik
- Yu yet bai tingting long hamas mani yu laik spenim long baim pawa
- Yu yet kontrolim hamas pawa bai yu yusim
- Bai i nogat moa diskoneksen sapos yu no baim bil
- Yu no inap moa kisim ol bil long wanwan mun

Long kisim dispela sevis, yu mas baim olgeta bil bilong yu long dispela yia inap long mun Janueri na Februari, 2005. Sapos yu no baim bil bilong yu bai PNG Power i diskonektim pawa saplai i kam long haus bilong yu taim ol i putim ol Easipay i go insait long haus.

Sapos yu bagarapim ol mita oa wokim ol koneksen bilong yu yet long stilim pawa, i moa beta yu go na aplai long PNG Power Ofis klostu long yu long konektim saplai i kam long haus bilong yu gut pastaim long wok bilong Easipay i kam long hap bilong yu. Nogut bai ol i diskonektim pawa saplai bilong yu na bai yu baim bikpela mani long kisim saplai bek gen na kos bilong Easipay mita tu.

Wokim samting stret na amamas wantaim Easipay.

Sapos yu laikim moa toksave long Easipay, go long PNG Power Ofis klostu long yu oa ringim telefon namba 982 9040 oa 982 9065.

Toksave i kam long Pablik Rilesens Seksen

Hap Hap Nius

Westen

Hailans LLG singaut long distrik mani

OL Lokol Level Gavman Kaunsel long Westen Hailans provns i sot long mani bilong ranim ol wok bilong ol long dispela yia. Samting olsem 15 kaunsel eria i no bin kisim mani bilong ol long pinisim mak bilong ol long dispela fainensel yia na dispela i kirapim bikpela askim nau long ol kaunsel presiden bilong wanwan LLG insait long provns.

Oi i tok mani mak olsem K400,000 i no kam yet na dispela i no asua bilong ol. Bikos olgeta i stretim pinis ripot bilong ol na salim i go bek long kisim hap distrik mani bilong ol long dispela yia.

Mani mak wanwan distrik i save kisim i olsem K1.7 milien olgeta yia tasol dispela yia ol i no kisim dispela mak stret.

Abal winim bek Wabeg Open sit

SAMUEL Abal i winim bek sia bilong em long Wabeg Open insait long bai ileksen taim Ritening Opisa i tokaut long risal bilong ileksen long las wiken.

Mista Abal i bin winim dispela sit bilong Wabeg Open long 2002 nesenel ileksen tasol olpela memba Daniel Kapi i kamapim kot bilong ileksen disput long win bilong Mista Abal na kot i rausim dispela win bilong em.

Dispela sit bilong Wabeg Open i bin stap klostu tupela yia nating long wetim bai ileksen inap las wik tasol ilek-

sen i pinis anit long nupela sistem bilong vot ol i kolim preferensel voting sistem.

Mista Abal i kisim bikpela tok amamas i kam ol bikman olsem memba Kandep Don Polye.


Mista Polye i tok amamas long win bilong Mista Abal olsem em i wanpela gutpela ileksen we i nogat hevi o trabel i kamap na tu i soim olsem pipel i laikim Mista Abal olsem lida bilong ol.

Mista Polye i tok em i bilip win bilong Abal inap kamapim sampela gutpela senis long

Wabeg na tu gutpela wok poroman na bung wantaim namel long ol pipel na lida tu inap kamap gut.

Mista Abal i tokaut olsem em bai stap wantaim Gavman bikos em i nogat taim bilong westim long palamen. Em i gat wok bilong mekim long ilektoret bilong em na em i mas sindaun isi na go het wantaim ol wok na plen em i go long mekim.

Dispela bai ileksen bilong Wabeg Open i bin ron gut tru na i nogat hevi o trabel olsem bipo.



Hagen stall: Kainkain stail bilum we inap givim bikpela kala long yu taim yu karim. Em han mak bilong ol mama hailans we ol i wokim na hangamapim long Kagamuga ples balus long Hagen. Poto James Kila

Wara Kofena i kamapim pret long bris

James Kila i raitim

MORAN bris long Daulo distrik long Isten Hailans provns i klostu bai pundaun go daun long wara taim wara i tait sampela taim bihain. Dispela bris em Yumi Yet Bris program i kamapim.

Long dispela wik wara Kofena i tait i kam na wasim bikpela hap graun na ol sait sait bilong bris we i lukim bris i sanap krangi long go daun long wara bihain.

Sapos dispela hevi i kamap em inap katim ol bikpela sevis i go long ol kopi plentesen na ol gavman na misin wok i stap long Kongi Miruma eria long Apa Asaro.

Oi Kofena asples i tokaut olsem bipo wara i save ron stret tasol taim ol enjinia bilong Yumi Yet Bris program i bin senisim ron bilong wara i go long kona em nau wara i stat long kaikai ol graun long sait bilong rot i go.

Wanpela komyuniti na Jenerel Menesa bilong Siheeni Kopi Projek, David Oromarie it ok Kofena bris em bikpela samting long bisnis na wok-about bilong planti tausen manmeri long Kongi Miruma eria long Daulo distrik.

Mi wari olsem ol bikpela sevis ol pipel bilong Kongi Miruma i save kisim i kam long Goroka bai stop, Mista Oromarie i tok.

Taim mi amamas long gutpela wok bilong Yumi Yet Bris Program, ol enjinia i abrus long dispela eria we hevi na bagarap bai kamap long en, em i tok.

Em i tok bikpela wari bilong em nau em ol kopi long plentesen bilong em na tu ol kopi bilong ol fama long ples bai i go long Goroka maket olsem wanem.

Wanpela eksen i mas kamap hari-ap long stretim dispela hevi long i no ken kamapim bikpela hevi long bihain, Mista Oromarie i tok.

Simbu fama sapotim ol bus ples

James Kila i raitim

WANPELA fama grup long Simbu provns i mekim bikpela samting long putim mani bilong ol yet long helpim ol fama bilong ol longwe ples insait long hailans long salim kopi bilong ol long balus i go long maket.

Simbu Koporetiv Farmers i bin bungim mani na peim i go long mesing dairekta bilong Trans Niugini Airways (TNA) long karim ol beg kopi bilong ol fama insait long ol bus ples olsem Karamui na Negabo i go long Kundiawa na Goroka.

Dispela em wanpela bikpela wok helpim we Simbu Koporetiv Farmers i kamapim wantaim helpim na sapot bilong Kopi Industri Kopresen (CIC) long bihainim polisi bilong Gavman ol i kolim Ekspot Driven Polisi.

Dispela bikpela helpim tu i helpim tru ol fama bilong ol bus na longwe ples we balus i kos bikpela mani tru long ol long salim ol kopi beg bilong ol long balus i go long maket.

Siaman bilong Simbu maketing grup Supa Kopa bilong Suave i tok grup bilong em i luksave long bikpela hat taim ol kofi fama long ol bus na longwe ples olsem long Karamui i bungim long dispela hatpela taim bilong mani na bisnis.

Oi i luksave olsem ol ples olsem Karamui i save kamapim ol gutpela kofi tru tasol kos bilong balus i bikpela tru na i mekim hat long ol ples manmeri long salim ol dispela naispela kofi bilong ol na plant kofi i save sting nating long ples.

Sief Eksekutiv bilong Opisa bilong Kopi Industri Kopresen (CIC) Ricky Mitio i mekim bikpela tok amamas i go long Simbu fama long kamap wantaim dispela bikpela helpim tru long helpim ol lain bilong ol long Simbu provns insait long ol longwe bus ples.

Mista Mitio i tok ol grup olsem bai i sanap strong sapos i gat gutpela lidasip, wok i ron stret na ol rekot i klia.



EASIPAY BAI I KAM LONG LAE

PNG Power Ltd i gat gutpela nius bilong ol pablik insait long Lae Provns.

Yupela bai kisim Easipay mita bilong ilektrisiti oa pawa long nupela yia. Toksave bilong wanem taim stret bai Easipay mita i kamap long Lae bai kamap klostu long ol niuspepa, radio na televisen. Easipay Mita em i wanpela system we yu bai baim ol unit pawa long yusim.

Easipay i gutpela long wanem:

- Kos bilong baim pawa i liklik
- Yu yet bai tingting long hamas mani yu laik spenim long baim pawa
- Yu yet kontrolim hamas pawa bai yu yusim
- Bai i nogat moa diskoneksen sapos yu no baim bil
- Yu no inap moa kisim ol bil long wanwan mun

Long kisim dispela sevis, yu mas baim olgeta bil bilong yu long dispela yia inap long mun Janueri na Februari, 2005. Sapos yu no baim bil bilong yu bai PNG Power i diskonektim pawa saplai i kam long haus bilong yu taim ol i putim ol Easipay i go insait long haus.

Sapos yu bagarapim ol mita oa wokim ol koneksen bilong yu yet long stilim pawa, i moa beta yu go na aplai long PNG Power Ofis klostu long yu long konektim saplai i kam long haus bilong yu gut pastaim long wok bilong Easipay i kam long hap bilong yu. Nogut bai ol i diskonektim pawa saplai bilong yu na bai yu baim bikpela mani long kisim saplai bek gen na kos bilong Easipay mita tu.

Wokim samting stret na amamas wantaim Easipay.

Sapos yu laikim moa toksave long Easipay, go long PNG Power Ofis klostu long yu oa ringim telefon namba **472 3325 or 472 2544** sapos yu stap long Lae.

Toksava i kam long Pablik Rilesens Seksen

Olpela soldia klostu kilim narapela soldia

Augustine Wamugl i raitim

Wanpela ami bilong Militari Polis (MP) long Goldie Bareks long Mosbi i bin kam bek long diuti na laik kisim malolo long rum bilong em na bungim Birua long las wiken. Taim em i redi long slip na em harim wanpela man i kam nok long dua bilong rum bilong em. Dispela soldia i opim dua na biruaman i hariap katim em tripela taim long het bilong em wantaim busniap.

Dispela biruaman em i wanpela olpela soldia na bipo musikman (Wantok i holim bek nem)

Ripot Wantok i kisim i tok dispela soldia i holim pasim dispela olpela soldia taim em i laik ronowe tasol blut i ron long het i pasim pes bilong em na singaut long helpim bilong ol narapela soldia. Taim ol i kamap planti blut i kam aut na al bilong em i raun olsem na em i lusim dispela olpela soldia i go na em i ronowe.

Wanem as tru bilong katim dispela soldia i no kila yet. Dispela i kamap long singel kota bilong ol militari polis long Murry Bareks long Sande 12:30 biknait. Ol i hariap long kisim em i go long haus sik na laki tru em i no dai.

Ripot bilong haus sik i soim olsem bun bilong het bilong em i gat mak bilong bruk.

Man husat i kisim bagarap i tokaut olsem ol polisman bai mekim wok bilong holim pasim dispela biruaman.

Em i tok ino gutpela long ol soldia o em yet wantaim ol lain bilong em i painim em. Olgeta samting em lo yet bai stretim, em i tok.

Setelmen Trening Senta opim nupela klasrum

Desney Koimo i raitim

GAVMAN bilong Japan i givim bikipela helpim i go long Pot Mosbi Setelmen Trening Senta we i lukim ol i gat ol nupela klasrum.

Las wik i namba tri taim Gavman bilong Japan i kamap long lukim opim bilong wanpela bikipela klasrum we bai holim ol opis tu. Gavman bilong Japan i bin givim moa long K270, 000 we i kam aninit long grasrut program long helpim Papua Niugini. Mani i karamapim kos bilong wokim klasrum, ol kom-pita na projekta.

Bisop Cherubin Damdui husat i kamap long blesim dispela nupela klasrum i givim tok amamas i go long gavman bilong Japan long putim mani i go insait long dispela kain ol trening senta long helpim ol setelmen lain.

Em i tok dispela klasrum bai helpim wok

bilong ol tisa na sumatin tu we ol nau bai gat planti spes long mekim wok.

Dispela senta em i op long olgeta kain man na meri husat i laik kisim save long mekim ol liklik wok bilong helpim ol yet long wanem hap ol i stap long en. Long dispela trening senta i givim ol kos olsem save long samap, tailoring, handikraf na kukim kaikai we man na meri wantaim i ken kisim.

Mary Parade husat i wanpela tisa na trena bilong ol namba tu yia tailoring sumatin i tok skul i save kisim kain kain sumatin stat long ol skul liva, haus mama, stret mangi o ol tisa bilong ol top ap skul husat i laik kism moa save long hom ikomoniks.

"Bikos dispela i wanpela setelmen trening senta mipela i helpim ol sumatin bilong mipela long liklik save we ol i ken yusim long mekim ol samting na salim na lukautim ol yet", em i tok.



Wantok o? ol lain bilong Wantok niuspepa i redi long bikipela pati bilong olgeta nius bisnis ol i kolim Media Krismas pati long dispela wiken long Mosbi. PNG Media Council i go pas long kamapim dispela pati we bai i gat ol pilai olsem drama, musik singsing na danis i kam long wanwan media haus. Bai ol niusmameri i kisim sampela luksave prais i kam tu long PNG Media Council long gutpela wok bilong ol. Extension Band tu bai istap long mekim nois wantaim ol musik long stretim laik bilong ol nius lain. Wantok niuspepa bilong yumi stret i sambal tu long traime sampela 5 ki bilong PNG na ating ol bai kam gut ya.

Taurama Kempes bai kisim nupela nening akademik klasrum

Desney Koimo i raitim

SKUL bilong Marasin na Helt Saiens insait long Taurama Kempes bai kisim nupela tu stori akedemik haus bilong Nening Program bilong em.

Projek Darekta bilong kapesiti bilding insait long Nening Edukesen Program wantaim Din bilong Skul ov Marasin na Helt Saiens i lukim ol i brukim graun long las wik long hap we nupela bilding bai i sanap.

Australian Gavman i bin givim mani tru long AusAID Insentiv Fan program i kam long Papua Niugini. Infratech Manesmen

Konsaltans Ltd na PNG Konsaltan Akitek na Enjinaring Fem i mekim desain bilong bilding. Homeguard Ltd i winim pinis kontrak long kirapim wok taim olgeta samting i redi.

Dispela bilding ol bai mekim long intanesenel standad we bai kisim 1800 skwea mita na bai pinis long June 2005.

Insait long dispela bilding bai holim nupela arts lekse rum, kom-pita leb, praktikal klinikal leb, ol klasrum na wanpela medikal imijing leb long antap flo. Long graun flo em ol tolet, stafrum, konfrens rum na risepsen bai i stap.

Disain bilong dispela bilding em ol i mekim olsem ol tisa na sumatin wantaim bai i ken yusim wankain komputa network.

Profesa Sapuri i tok dispela bilding bilong ol nening edukesen insait long skul i bikipela samting tru bikos em bai i apim dispela hap bilong tism ol trening nes insait long kantri.

Yunivesiti bilong Papua Niugini i mekim bikipela tok amamas i go long AusAID long givim dispela mani bilong projek long go het.

Taim dispela nupela bilding i pinis bai i gat bikipela spes long lukim ol sumatin na tisa i muv fri long mekim wok bilong ol.



Dokta Mark Bain i kisim sek mani long han bilong Embeseda bilong Amerika Robert Fitts.

Motupore Ailan kisim \$US 32,000 i kam long Amerika

Maisan Pahun i raitim

Embasi bilong Yunaited Stet ov Amerika i givim \$US 32'000. 00 i go long Yunivesiti ov Papua Niugini (UPNG) long mekim ol wok long Motupore Ailan Rises Senta (MIRC).

Yunaited Stet (US) ambasado long Papua Niugini, Robert Fitts i givim sek mani na sikspela kompyuta na printa i go long MIRC long sekim na karimaut korol rif rises long Motupore Ailan.

Dairekta bilong MIRC Dokta Mark Baine i tok tenkyu i go long helpim bilong US embasi. "Kain mani na sikspela kompyuta wantaim printa i soim gutpela sain nau long kirapim wok rises," Dokta. Baine i tok.

Long dispela mani na kompyuta MIRC i tingting long kirapim wanpela solwara rises sip ol i save kolim Scomber, baim ol samting long daiv na putim wanpela projekta bilong soim piksa insait long Motupore konfrens rum.

Motupore ailan i wanpela rises ples bilong ol saintist we ol i save

stadi long laip bilong solwara, rif na ol abus bilong solwara. Yunivesiti bilong Papua Niugini i was long dispela ailan na i gat man i stap long en.

Nau yet planti manmeri husat i bilong ol Non Gavman Ogenaisasen grup (NGO) i save askim tumas long go miting na wokim rises o wok painimaut long Motupore Ailan. "MIRC bai amamas long givim trening long ol ausait manmeri, skul sumatin na ol rises lain husat i laik yusim Motupore ailan," Dokta. Baine i tok.

FREE

FUEL

FOR A LIMITED TIME ONLY

From outboards to boats, generators to pumps and scooters to bikes... Yamaha has the product range to suit all your needs

Purchase any Yamaha product and receive a 20 Litre container of...

FREE FUEL

X-TREME

Powering the Nation

Value Quality Reliability

Ela Motors

YAMAHA

Stori bilong Wol AIDS De

David Ephraim i raitim

WOL AIDS De em i de bilong ol manmeri insait long olgeta hap bilong graun i kam wok bung wantaim long luksave na rausim sik AIDS long wol.

Long Jenuari 1988 bikpela kibung i bin pasim toktok long makim Disemba 1 olsem Wol AIDS De.

Bikpela as tingting bilong ol Helt Minista em, sapos olgeta manmeri i kam wok bung wantaim bai i gat bikpela pawa long daunim AIDS long wol.

Het tok bilong fes Wol AIDS De em i bin "Joining the World Wide Effort" o "Bungim Strong Wantaim Wol".

I kam inap nau, olgeta yia i save gat ol wanwan het tok long luksave long ol manmeri husat HIV/AIDS i bagarapim.

Long 1990, het tok bilong Wol AIDS De i bin "Ol meri na AIDS", long 1997 i bin "Ol Pikinini i Stap long Graun i gat AIDS", long 2002 het tok i olsem "Man i ken Senisim" na long las yia em i bin "Stap na Yumi Stap".

Bikpela het tok bilong 2004 Wol AIDS De em "Stopim Birua Pasin long ol Meri".

Dispela yia bai makim 17 yia olgeta we ol manmeri long olgeta hap graun i luksave long Wol AIDS De.

Strongpela AIDS aweanes na bihainim gutpela pasin

....Toktok i kam long opis bilong Pop long Wol AIDS De

Veronica Hatutasi i raitim

STRONGPELA aweanes edukesen i mas kamap we i luksave long mining bilong laip olsem em i santu. I no samting bilong pilai pilai wantaim. Narapela bikpela samting tu em wok bilong skulim ol yangpela long bihainim gutpela pasin. Dispela em toktok we hetman bilong Katolik Sios long wol, Pop Paul 2 i mekim long makim Wol AIDS De.

Lukautim gut ol lain i gat dispela sik long givim medikol, spiritsel, sosel na pastorel helpim em i bikpela samting we Papa Santu i laikim pipel i mas givim long ol.

Presiden bilong Kaunsil bilong Helt na Pastorel Kea long Vatiken Kadinel Javier Lozano Barragan i autim ol dispela toktok.

Long olgeta hap bilong wol, Disemba 1 i olsem Wol AIDS De long makim na tingim na wokim plen long



• Pope John Paul

wanem samting ol kantri, ol gavman, ol sios, ol NGO, komyuniti na pipel i ken mekim long daunim dispela sik we i ron olsem paia na bagarapim na kilim dai planti pipel insait long wol tude.

Narapela samting, we Kadinel Lozano i tok long makim bilong daunim HIV/AIDS em long rausim olgeta pasin bilong rabisim ol lain wantaim dispela sik.

Em i singaut tu long daunim prais bilong mafasin long ol lain i gat HIV/AIDS we ol i kolim long Anti Vairel Drag.

Em i tok long dispela yia, het tok bilong Wol AIDS de

i lukluk strong long ol meri bikos bagarap sik i kamapim long ol meri i kamapim pasin we ol i daunim rait bilong ol.

Em i tok taim HIV/AIDS i bagarapim moa meri husat i as long famili na komyuniti, moa hevi i kamap long sosel eria we i bruk daun. Na em i tok sios i save sapotim ol meri na givim ol luksave na i wok long pait long daunim pasin bilong rabisim na bagarapim ol meri we i stap yet tude long olgeta eria olsem edukesen, helt na wok.

Kadinel na Vatiken i wari tu long ol pikinini we i nogat papamama bikos ol papamama i lusim ol taim ol i dai long AIDS. Planti em long Afrika.

Ol ripot i kam long UNICEF, UNAIDS na USAIDS long 2004 i soim olsem nau mak bilong ol pikinini wantaim nogat papamama bikos ol i dai long AIDS em i stap olsem 15 milien.

Toktok bilong Thora Ahmed Obaid, Eksekutiv Dairekta bilong UNFA

SINGAUT i go long ol wol lida long bihainim ol toktok ol bin mekim long Iritenesel Konferens long Populesen na Developmen long Cairo, Ijip long 1994 long lukim olsem olgeta pikinini man na meri wantaim i mas gat gutpela helt na rait taim yumi kamap long yia 2015.

Toktok i kam long Mista Ahmed Obaid husat i Eksekutiv Dairekta bilong Yunaitet Nesen Famili Plening Asosiesen (UNFPA) long selebretim Wol AIDS De aste.

Em i tok long olgeta hap bilong wol, AIDS i bagarapim ol meri moa yet bikos antap long mak bilong ol meri i stap na dai tu wantaim dispela sik i antap moa, ol meri i wok long lukautim ol arapela pipel i gat dispela sik.

Em i tok tu olsem save bilong ol meri long dispela sik na rot we pipel i kisim dispela sik i no tumas na wanem samting ol i save em i no helpim ol bikos long pasin bilong paitim na bagarapim ol we ol i save blingim.

"Long daunim HIV/AIDS i kalap long moa pipel, yumi mas daunim pasin bilong sot long samting, rabisim ol meri na vailens o pasin bilong paitim nogut meri.

Yumi mas rausim pasin ol pikinini i marit taim ol i no inap yet long marit, autim moa infomesen long riprodaktiv oger o ol hap bodi we i save wokim bebi long ol na luksave long raits bikos tude, HIV/AIDS i kamap long pasin bilong manmeri i slip

WIN A KEY HOME
6 K\$, 000 BRIAN BELL SHOPPING VOUCHER

PLUS 6 WEEKLY SHARP PRIZES TO BE WON!

Christmas Brian Bell

2 Burner Cast Iron Stove
K65.00 / K95.00

2 Burner Electric Cooker
K99.00

Cornell Electric Rotisserie Oven
K489.00

Butterfly Single Burner Kerosene Stove
K87.50

Butterfly Double Burner Kerosene Stove
K167.00

Omega Mini Electric Stove with Oven
K1089.00

Deko 2 Burner Gas Stove
K472.00

GRAB A COPY OF OUR 2004 CHRISTMAS CATALOGUE Available at all Brian Bell Stores

Integrity 4.5kg T/Tub Washing Machine
K499.00

SPEND OVER K100.00 & Get a Free SOFT TOY

19Ltr LG Microwave
K469.00

19Ltr LG Microwave
K535.00

Deko 4 Burner Gas Stove with Oven
K875.00

Brian Bell

BOROKO HOME CENTRE CITY LAE GOROKA MT HAGEN KOKORO
MADANG HOME CENTRE CITY GORDONS

Laik pasin long trupela wol

Veronica Hatutasi i raitim

Mi gat bikpela laik olsem moa man na meri i ken toktok long wanpela narapela. Mi save olsem ol i save gris wantaim, tok kros long sampela taim na toktok gut wantaim wanpela arapela long sampela taim. Tasol hamas taim ol i save toktok long ol bikpela samting insait long laip na sindaun bilong ol? Planti marit i save stap aninit long wanpela haus, serim kaikai, slip wantaim, gat pikinini tasol ol i no save gat taim long serim wanpela toktok long bel o laik bilong ol long wanpela arapela.

Planti taim em i olsem man na meri i stap long narapela planet o ol i kam long narapela wol.

Long dispela taim, tupela pipel husat i marit long sios na mekim promis long stap pas wantaim inap ol i dai i moabeta long ol i stap wantaim moa long 40 krismas o moa. Dispela em i longpela taim, winim ol yia we ol i stap wantaim papamama. Ol pikinini bai groap na marit, tasol ol marit bai stap wantaim yet. Tasol sore, ol i no save gut long wanpela arapela.

Ol man i tokim mi olsem em i no pasin tum-buna bilong mipela long toktok wantaim ol meri. Long ples, ol man i stap wantaim ol man na ol meri i stap wantaim ol meri yet. Ol man i save

go painim abus long bus taim ol meri i go painim kaikai long gaden. Mipela i no save toktok wantaim ol meri. Dispela pasin i stap long taim bipo yet. Dispela em i kalsa bilong mipela.

Tasol kalsa i wok long senis nau. Planti meri i kisim gutpela skul na ol i laikim moa samting long laip. Long Mosbi, planti pipel i baim kaikai long stoa na ol man i ken go painim wok we ol i ken kisim mani na baim kaikai. Sapos yumi traim long mekim ol samting olsem yumi save mekim long ol taim bipo yet, em bai ino inap wok long PNG we i wok long senis nau. Sapos ol man na meri i no painim rot long helpim wanpela arapela, bai i gat moa taim bilong sori long ol man na meri wantaim.

Mi save ting olsem em i isi stret long yumi yusim ekskius "em i no kalsa bilong mipela". Kalsa i no tokim yumi wanem samting i rait. Pipel yet i save mekim wanem samting ol i laikim kalsa i kamap olsem wanem. Kalsa em i rot yumi laikim long mekim ol samting. Yumi yet i makim wanem kalsa yumi laikim na mekim em i go long rot yumi laikim long em. Tru, Kristieniti (Kristen pasin) i no hap long kalsa bilong mipela.

Planti wari na hevi yumi toktok long ol tude olsem man i paitim meri, marit i bruk, pikinini nogat papamama em yumi ken daunim sapos

man na meri i luksave na klia gut

long wanpela narapela. Tu, em bai hat long HIV/AIDS i bagarapim planti laip sapos man na meri i luksave long wanpela arapela olsem pipel na ol i no samting nating long pilai pilai na slip nabaut wantaim.

God i gat gutpela plen long man na meri. Taim em i givim yumi sakramen bilong marit, em i wokim dispela long man na meri i ken stap wantaim na lainim long rot bilong kamap gutpela pren, ol pikinini bilong ol i ken gro long gutpela banis na stap amamas

na pasin bilong slip wantaim wanpela arapela em i olsem tupela pipel i givim amamas long wanpela arapela. Na i no painim amamas long sotpela taim tasol wantaim man o meri yumi i no gat laik long ol na bai yumi stap wantaim hevi insait long laip bilong yumi.



• Ol pasto na pater long Goroka i wok bung wantaim long skruim wok insait long komyuniti.
L-R: reveren Kauga Baglme-Foskwea, Pasto Philip Upegito bilong CLC na Pater John Ryan-Katolik Sios.

Motu Baibel selebretim 10-pela krismas

Veronica Hatutasi i raitim

BAIBEL Sosaiti long PNG em i wanpela ogenaisesen we ol Kristen Sios i wok bung wantaim long sevim ol sios na pipel long kantri. Sosaiti i save promotim distribusen o salim buk Baibel long olgeta hap bilong kantri.

Wok bilong Sosaiti em long helpim ol sios long trenim ol manmeri long tanim toktok na kamapim ol gutpela program bilong tanim toktok. Tu, em i save raitim kamap o kamapim ol hap bilong Baibel Ves ol man, ogenaisesen na sios i laikim. Em i save ofaim sevls bilong Sosaiti i go long ol lain o grup husat i tiim ol Baibel buk insait long kantri.

Baibel wok insait long PNG i bin stat long 1881 long taim ol i trensletim o tanim nambawan Gospel long Tok Motu. Baibel Sosaiti long Australia i bin lukautim Baibel wok long PNG long 30 krismas inap long 1975 taim ol i fomim Baibel Sosaiti bilong PNG yet. Long 1976, em bin kamap memba long Yunaitet Sosaiti. Tude het opis bilong Baibel sosaiti i stap long Koki insait long Nesenel kapitel Distrik.

Orait, long las Sarere Novemba 27, Baibel Sosaiti i bin selebretim 10 yia bilong Motu Baibel we ol i bin tanim. Long nau, ol i tanim Baibel na tu, sampela hap bilong Olpela na Nupela Testamen i go long sampela tok ples long PNG.

Em i bikpela salens tru long karimaut wok bilong tanim Buk Baibel bikos PNG i gat moa long 800 tokples. Sampela tokples i gat sampela hap Baibel ol i tanim pinis. Olsem long Kiriwina long Milen Be we ol i tanim sampela hap bilong Olpela na Nupela Testamen na ol i kolim dispela buk long Kiriwina Shorter Bible. Ol lain i save long Polis o Hiri Motu, i klia gut long Tok bilong God long Hiri Motu Baibel. Buka Helaga em i hat long ol lain i no save long tok Motu.

Taim ol bin kamap wantaim Hiri Motu Baibel long 1994, em bin bikpela samting tru long ol pipel insait long Sauten Rijen.s Long wankain taim tu, dispela i min olsem tokples ya i no inap ius na ol lain i kam biahin bai save na kisim Tok bilong Bikpela long Hiri Motu Baibel.

Bikpela askim i go long ol grasrut Kristen long yusim Hiri Motu Baibel long ol famili divosen o prela, sios sevis, Baibel stadi na long ol arapela sios program.

Baibel Sosaiti opis i tok ol bai askim ol radio stesen long yusim Baibel long ritim ves bilong de we i givim gutpela stia long ol pipel olsem ol bin save wokim long ol yia i go pinis.

Sosaiti i tok tenkyu tu long ol misinari, ol lei pipel o man nating na ol volunfia husat i bin helpim long wok tanim na ol arapela eria moa long ol.

Long wankain taim, ol tanim tok lain long Koki Baibel Sosaiti i wok long tanim Vula Baibel, em long tokples bilong ol Hula pipel insait long Senterl provins.

Long dispela taim, samting olsem 86 pipel bilong PNG i mekim wok long tanim Buk Baibel. Sampela wok i pinis na sampela i no yet.

Sosaiti i mekim gutpela wok na sapos yu laik givim helpim, yu ken kamap memba bilong PNG Baibel Sosaiti long helpim skruim wok na Tok bilong Bikpela.

Famili laip opis pait strong long daunim hevi

KATOLIK sios famili laip opis insait long Kimbe daiosis i lukim planti kainkain hevi i wok

long bungim ol meri husat i no save sindaun gut long ol haus bilong ol na lukautim famili.

Man husat i go pas long dispela opis long Kimbe Erhim Batari i tokaut olsem namba bilong ol dispela problem bilong ol mama i bikpela tru na Katolik sios i wok long painim wei long helpim na daunim dispela hevi.

Daiosis nau i gat wanpela kombain pasto tim long 11-pela paris bilong em insait long Wes Niu Briten provins husat i

wok long go aut long givim skul long ol meri long kamapim gutpela sindaun insait long famili na komyuniti bilong ol.

Em i tok ol papa na mama i mas save olsem ol i haus holi bilong God na i noken paol nambaut.

"Ol mama husat i wokim wok ministri bai painim sampela hat taim long wok bilong ol bikos dispela pasin i stap long

ol mama na ol meri we ol laik karim wok i go long ol. Tasol ol i mas wok strong i go insait long dispela hevi long kamapim rot bilong stretim", em i tok.

Mista Batari i askim ol meri long noken larim hevi i painim ol tasol i mas wok strong long bringim tok bilong God i go insait long ol komyuniti bilong ol wantaim wanbel pasin.

Ol Pastor long Goroka wok bung wantaim

Augustine Wamugl i raitim

Olgeta Pastor long Goroka taun i wokbung wantaim long kamapim kingdom bilong God. As tingting bilong dispela wok bung em bilong ol pipel long Goroka taun long painim bel isi na wanbel. Tru igat kainkain wei bilong lotu tasol i gat wanpela kingdom bilong God tasol.

Pater John Ryan bilong Divine Word misinari i tokim ol Pasto "yumi bilip long God na God yet i bungim yumi ol Pasto long kam bung, yumi save i gat long-

pela rot long go na yumi mas wokabaut olsem brata susa na sapatim wanpela narapela. Pastor i nogat amamas long pipel bilong em bai ol kongrigesen i save go aut".

Dispela miting i kamap long sios bilong ol Salvesen Ami long namba 4 de bilong Novemba dispela yia long Not Goroka yet. Wanpela gutpela samting ol i wokim pinis em wokbung wantaim long haus sik na haus kalabus we ol i lukim planti senis i kamap pinis na ol i amamas long en.



"Wanem samting bai i kamap long gutpela man na man nogut."

Liklik samting bilong wanpela stretpela man i winim planti samting bilong olgeta man nogut. Long wanem, Bikpela bai i pinisim strong bilong ol man nogut, na em bai lukautim gut ol stretpela man. Bikpela i save was gut long ol manmeri i bihainim tok bilong em. Na ol samting God i givim ol, e mol bai i holim oltaim. Long taim nogut ol i no inap painim hevi. Na long taim bilong hangre bai ol i gat planti kaikai. Ol bai i no inap sot. Tasol ol man nogut bai ol i bagarap olgeta. Ol birua bilong Bikpela bai ol i lus, olsem gutpela bilas bilong plaua na gras. Tru tumas, bai ol i lus olsem smok i save stap liklik taim tasol na i go pinis. Man nogut i save dinau long ol samting na em i no save bekim dinau. Tasol stretpela man i save mekim gutpela pasin na em i save givim planti samting long ol arapela man. Buk Song 37: 16-21

Ol man i givim gutpela sapat

Veronica Hatutasi i raitim

OL man i wok long luksave nau long hevi ol meri i save karim na bikpela wok ol i mekim long famili na ol i givim sapat long ol long sait bilong daunim pasin bilong paitim na bagarapim ol meri na pikinini.

Long nambawan taim, 7-pela grup bilong ol man i bin mas long sapatim ol meri na go olgeta long Sir John Guise Stadium long Mosbi na stap insait long ol selebren bilong luksave long "Women Against Violence Day". Dispela em de we ol meri long olgeta hap bilong wol i luksave long en olsem de bilong lusim pasin bilong paitim, rabisim, bagarapim na ol arapela kain samting long bagarapim ol meri.

Wanpela bikpela bilong Dipatmen bilong Sosel Welfea Gai Misingyaki i tok em i amamas tru long lukim ol man i sapatim ol meri long daunim dispela vailens o pasin bilong mekim nogut long ol meri.

"Mi amamas stret olsem ol man i wok long sapatim mipela nau long daunim na pinisim pasin bilong bagarapim na rabisim na i no luksave long raits bilong ol meri. I gutpela moa yet long dispela yia bikos long namba wan taim, sampela grup bilong ol man na yut i ogenaisim ol samting i kamap long dispela de. Long ol yia i go pinis, ol meri grup tasol i save wokim olgeta samting bilong luksave long dispela de. Nau mi pilim olsem ol man i wok long



• Ol yangpela na skul meri i stap insait long mas i go long Stedium bilong luksave long de bilong stopim pasin bilong bagarapim ol meri. FOTO:JOE IVAHARIA.

kisim ol toktok mipela i mekim long planti yai nau.

Taim ol meri yet i mekim ol samting long luksave long dispela de wanraim nogat sapat bilong ol man, em i no gutpela bikos i luk olsem ol meri i stap ol yet. Tasol nau ol man i go pas long ol selebren bilong dispela de, yumi ken stal long lukim lait long narapela sait. Nau mi ken tok samting tru bai kamap." Misis Misingyaki i tok.

Helen Tuka em wanpela yangpela meri i sapatim wok bilong daunim pasin long mekim nogut long ol meri S tok long dispela taim, planti pasin nogut i wok long kamap insait long ol famili. Pasin olsem paitim ol meri na pikinini na ol mama na pikinini i paul. Na i gutpela long kisim helpim na ripotim ol samting long ol polis na grup olsem Famili na Seksuel Vailens Komiti.

"Planti pasin long sampela papa i wokim pasin nogut wantaim ol pikinini meri

bilong ol na tu, sampela mama i wokim pasin nogut wantaim ol pikinini man i kamap. Yumi i mas rausim ol dispela samting nogut i bagarapim sosaiti na famili. Mi askim strong ol meri long ripotim dispela kain samting i kamap long Famili Seksuel vailens Komiti na Polis hari-ap tasol taim ol i kamap.

"Mi amamas long Famili Vailens Komiti i karimaut aweanes long komyuniti na bai em i helpim ol famili na ol pikinini we dispela kain hevi i kamap long ol," Mis Tuka i tok.

Long selebretim dispela de long las Fonde, ol grup bilong ol man i sapatim pait long dainim pasin bilong paitim na wokim nogut long ol meri i bin mas long wan wan grup bilong ol na go olgeta long Stedium. PNG Men Against Violence i bin mas long Ward Strip skul na sampela meri sumatin bilong skul i bin go pas long mas i go long Stedium. PNG Youth Against Corruption grup i bin bung long HoholaYut Dvelopmen Senta na wan-

taim Badili Yut Bras Ben i go pas, ol bin mas i go long Stedium. Grup bilong Port Moresby City Mission i bin bung long Gaden Hills bas stop na wantaim Siks Mail Tin ken mangi i go pas pairapim musik bilong ol, ol bin mas i go long Stedium tu.

Ol man olsem Pater John Glyn husat i papa bilong PNG Yut Against Corruption na ol arapela i bin go pas long ol man na yut grup long redim na givim sapat long ol meri long dispela de.

Het tok long luksave long dispela de bilong dispela yia em "PNG men and Youth say no to Violence".

Insait long 16 de i stat long Novemba 25 em "Violence Against Women's Day, Desemba 1 em Wol AIDS De na Desemba 10 em Intenesenel Humen Raits de, ol wok na kempein i kamap long daunim pasin bilong vailens long ol meri, wok long daunim sik AIDS na strongim save olsem olgeta man na meri i gat wankain raits.

Pablik Prosekyuta sapatim pasin bilong daunim hevi egensim ol meri

....Ol man na yut grup go insait long daunim hevi

Veronica Hatutasi i raitim

"TOKTOK pastaim na stretim long maus" em i gutpela rot long stretim hevi" pablik Prosekyuta Chronox Manek i bin wokim dispela toktok long de bilong luksave long pasin bilong paitim, bagarapim na rabisim ol meri i mas stop.

Mista Manek i strongpela sapatim long stopim pasin bilong bagarapim na wokim nogut long ol meri i bin tok dispela em i namba 11 yia bihain long 100 kantri, ol grup na institusen long wol i sanap wantaim long daunim hevi we long Tok Inglis ol i kolim long "Violence Against Women".

Em bin amamas tru long lukim olsem long PNG nau, i gat ol man husat i laikim bai dispela pasin bilong bagarapim, paitim nogut na rabisim ol meri i mas pinis. Na em bin luksave na tok tenkyu long Pater John Glyn na yut grup bilong em Youth Against Corruption na ol arapela grup bilong ol yangpela insait long siti olsem City Mission long go insait long dispela wok long daunim vailens na korapsen o pasin bilong yusim opis bilong lida na paulim mani samting.

"Yumi wanwan i gat liklik wok long tok, stretim trabel na hevi bilong famili we man i paitim meri na pikinini long

haus pastaim. Sindaun na toktok na stretim.

Dispela apsin bilong tromoi han na askim kwesten bihain i mas pinis," Mista Manek i tok.

Em i tok em i taim nau long ol PNG man i luksave long hevi na go pas long wok bilong tok ogat long vailens o kamapim bagarap na hevi long ol meri.

Ol arapela lain i bin toktok long dispela bung long Stedium na tok dispela yia senis i kamap na i gutpela long lukim ol man i kamaut na toktok long dispela hevi we i kamap bikpela insait long PNG sosaiti.

"Man i bos na ol meri i stap daunbilo long ol em i bikpela hevi long PNG. Yumi mas edresim. I moabeta yumi mas toktok long dispela long haus, famili na wantaim ol haus lain," Mista Manek i tok.

Long wankain taim, sampela yangpela man long bung i wokim strongpela toktok long ol PNG man i senis bikos pasin bilong paitim na bagarapim meri na pikinini i no gutpela. Ol bin tok pastaim tu ol bin wokim dispela apsin tasol ol i luksave long hevi we dispela apsin i kamapim na ol i senis.

Bung i bin harim tu olsem pasin bilong pait i kamapim moa hevi bikos bai famili i tromoim moa mani long stretim ol dispela hevi.

Gavman luksave long ol pikinini

Desney Koimo i raitim

MINISTA bilong Sosel Dvelopmen na Welfea Ledi Carol Kidu i mekim bikpela tok tenkyu i go long olgeta lain husat i bin makim dispela Intenesenel De bilong ol pikinini i kamap gut las wik.

Em i tok dispela de bai i no inap long kamap gut sapos olgeta lain i no bin putim han wantaim long mekim wok.

Dispela i namba wan taim Gavman i luksave na go pas long mekim wok i kamap long amamasim dispela bikpela de wantaim helpim bilong lain olsem Midia, Polis, CIS, Boi na Gel Skaut, ol tisa na sumatin na ol komiti memba wantaim siaman bilong ol .

Ledi Kidu i tok ol pikinini em ol bikpelai risos bilong Papua Niugini na olgeta mas mekim wok long lukim ol i kamap gutpela ol gutpela manmeri bilong kantri.

Gavman nau i givim sapat bilong em long dispela Intenesenel de bilong ol pikinini bikos PNG tu i bin sainim dispela Trito o agrimen long Rait bilong ol Pikinini.

"Mipela i mekim liklik wok i kamap pinis tasol i gat planti wok yet i stap long mekim.

"Nau yet mipela i mas wok strong long putim mak bai long wankain taim olsem long 2005 taim mipela i amamasim 30yia bilong independens, mipela i ken tokaut olsem mipela i winim mak bilong hat wok bilong mipela long tukim ol pikinini i sindaun gut," LedinKidu i tok..

Em i tok wok nau i stap long han bilong famili, sios, skul na mipela wanwan man na meri long helpim na dvelopim dispela ol pikinini long kamap gutpela manmeri insait long kantri.

Lo bilong Lukautim ol mama na pikinini meri



Ol samting yumi mas save long Reip

Lo Bilong Lukautim ol mama na Pikinini Meri

TOKTOK long reip o pasin bilong bagarapim meri.

Bihain long kisim birua long reip, sampela meri i save soim aut bikpela pret na belhat tasol planti meri tu i no inap long soim belhat o pret. Tasol yu noken ting olsem meri i orait. Olgeta meri husat i

kisim birua long reip i save pret nogut tru long longpela taim bihain. Sapos yu save long wanpela meri i gat dispela birua, orait, yu noken tok baksait long em. Tingim, nogut dispela birua bai kamap long yu o wanpela long famili bilong yu.

Moa neks wik.

Sotpela Tok Lukaut

SKRUIM toktok long ol gutpela samting we Famili Plening i ken kamapim:

Gutpela samting long komyuniti em liklik populesen o mak bilong ol pipel i strongim komyuniti long i gat inap:

- Graun long wokim gaden na wokim haus
- Solwara o wara long painim abus
- Timab long wokim haus
- Paiawut long kuk.
- Kopi, kakau, kopra, welpam, vanilla long salim na kisim mani long en.

Famili Plening i helpim tu Kantri long dvelop na i ken karimaut ol wok plen long wokim inap:

- Skul bilding
- Ol helt senta, etpos na haus sik
- Ol spot graun o hap bilong pilai
- Haus bilong ol woklain

Famili Plening i save helpim long kantri i dvelop o go het, komyuniti na famili.

Moa long neks wik.

Nius Bilong HIV AIDS

Tok Lukaut



wanjaim

David Ephraim

TUDE long HIV/AIDS Nius bai mi toktok long ol Humen Raits na Wol AIDS De. Long dispela taim yumi wok long stap; planti ol awenes we ol Intenesenel Humen Raits Komyuniti i wok long ronim long kamapim gutpela sindaun bilong ol pipel insait long wol tete.

Mi laik tok olsem yumi ol pipel bilong Papua Niugini i mas luksave long ol hat wok bilong ol Intenesenel Humen Raits Komyuniti i wok long wokim long wok bung wantaim ol long daunim ol helt problems olsem HIV/AIDS, TB na ol pasin nogut we i save stopim developmen olsem pasin stil na ol paul pasin yumi kolim korapsen.

Gavman mas luksave long wok bilong Intenesenel Komyuniti long kamapim ol rot we ol pipel bilong yumi i ken wok bung wantaim long rausim ol birua bilong bagarapim humen laip o laip bilong pipel.

Wanpela rot we Gavman i ken wokim em long luksave na sainim ol Intenesenel Humen Raits Konvensen o lo we ol pipel i ken i gat bikpela rait long kotim ol manmeri husat i brukim ol bikpela Mama Lo bilong Humen Raits.

Long kamap bilong HIV/AIDS long wol planti ol save manmeri i wok long painim rot bilong stopim na rausim AIDS long wol.

Long 1988, ol save-man i bin kamap wantaim wanpela tingting long makim 1st Disemba olsem Wol AIDS De, bikpela astingting bilong Wol AIDS De em long luksave long AIDS long wol long wok bung wantaim long daunim na rausim AIDS long wol. Bikpela het toktok bilong dispela yia em long Stopim Birua pasin long ol Meri.

Long pinis mi laik tok Yumen Rait na Fridom em i birthright bilong yumi olgeta manmeri na dispela mas kamap namba wan risponsibiliti bilong Gavaman.

Luksave long AIDS long kantri na stopim pasin birua long ol meri.

Hepi Wol AIDS Dei

LONG Tok Lukaut long tude bai mi toktok long ol raits bilong ol yut na ol pikinini. Long ol sampela ol wik i go pinis i bin i gat ol bikpela Intenesenel De olsem Stopim birua pasin long ol Wimens De na Intenesenel De bilong ol Pikinini na long dispela wik, Wol AIDS De..

Dispela de em ol savemanmeri i bin makim long pulim tingting bilong ol manmeri husat i save brukim ol mama lo bilong Human Rights, long ol i luksave na Yunaitet Nesen Yunivesel Deklearesen ov Humen Raits we i karamapim kantri bilong yumi olsem memba bilong Yunaitet Nesen.

Tasol long kantri bilong yumi tete i nogat bikpela sapot i save go long ol yut na ol pikinini; planti taim ol wok-sop na miting i save kamap long nem bilong ol dispela grup tasol go hetim ol samting ol i toktok long em i no tumas.

Planti taim ol bikman na meri i save stap insait long ol dispela ol woksop na miting.

Sapos tru tru yumi tok olsem olgeta lain i gat raits, ol raits i mas i gat ol lain i makim ol yut na pikinini .

Yumi gat planti ol NGO, Sios na Gavman Ogenaisesen i wok long bikmaus long ol rait bilong pikinini na yut inap sampela bilong ol dispela ol lain i save sanap strong long wok bilong Humen Raits i go long Godens maket na lainim ol manmeri long ol raits bilong ol.

Long pinis mi laik tok ol pipel i no stap long Crown Plaza ol i stap long ples na strit. Plis traim na yusim het.

HIV/AIDS stap pinis long kantri kirap na luksave na yusim het.

Wan milien pipel long PNG bai pundaun long sik

Veronica Hatutasi i raitim

SIK HIV/AIDS bai bagarapim samting olsem wan milien pipel insait long PNG long 10-pela yia i kam, WOL Helt Ogenaisesen il tok.

Rijinel Dairekta bilong WHO insait long Westen Pasifik Shigeru Omi i tokaut long dispela samting.

Em i tok skelim long mak we dispela sik i wok long gro long PNG, nau, bai mak i kamap long wan milien namel long 10 na 15 krismas.

Dokta Omi i tok mak inap long go daun sapos ol atoriti long kantri i wokim gutpelka disisen nau.

"Insait long wanpela mun, binatang bilong HIV i save kalap long 150 pipel. Na insait long

wanpela yia, mak i wok long go antap long 20 pesen.

Dokta Yves Renault i makim WHO long PNG i tok PNG i wok long bihainim kain HIV/AIDS hevi i kamap long Afrika.

Dokta Renault i bin wok long Afrika long 16 krismas i tok wan pisin pasin i mekim hat long karimaut ol program long daunim dispela sik nsait long PNG bikos i nogat dispela pasin bilong jenerel komyuniti wok bung.

Tasol long nau, planti grup we i karamapim tu ol sios i strongim ol wok aweanes na projek long daunim HIV/AIDS long PNG. Nau, mak bilong ol pipel long PNG i gat sik HIV/AIDS i kamap long 9,000.

Long ol arapela nius long Wol AIDS de, het tok bilong Wol AIDS de long dispela yia em "Women, Girls, HIV and AIDS.

Ol wan wan kantri long wol i ken kamapim het tok bilong ol tasol bikpela tingting i stap long dispela het tok i sut long ol meri na HIV/AIDS.

Ripot i tok long wol, 22 milien pipel i dai pinis long AIDS na nau, 42 milien i karim binatang bilong HIV/AIDS i stap.

Ol ripot i tok planti meri na ol yangpela pikinini meri i kisim HIV binatang bikos long bikhet pasin bilong ol narapela.

Na Wol AIDS de kempen we UNAIDS i sponsaim bai ranim toktok em, "Have you heard me Today" o "Yu harim me Tude?". Dispela hap tok i bilong strongim awenes na helpim etreseim ol palnti samting we ibagarapim planti meri na ol yangpela pikinini meri long sait bilong HIV/AIDS tude long wol.

Pe bilong ol tisa bai go antap

Desney Koimo i raitim

OL bai apim pe bilong olgeta tisa insait long kantri insait long tupela yia i kam.

Dispela i kamap bihain long Tisa Sevis Komisen i sainim wanpela agrimen wantaim PNG Tisa Asosiesen long pe na entaitelmen bilong ol tisa namel long 2005 na 2006.

Nau i namba 5 yia bilong dispela pe agrimen bilong 2000 we ol tisa i no kisim gut yet pe na ol arapela entaitelmen bilong ol.

Agrimen dispelal tupela lain i sainim bai lukim ol i apim pe long 5 pesen long 2005 inap 2007 we olgeta wantaim em 15 pesen long tripela yia.

Siaman bilong Tisa Sevis Komisen Alan Jogiaba i tok salens nau i stap long Dipatman bilong Edukesen na ol P r o v i n s a l Edministresen long bringim gutpela sevis olsem pe bilong ol tisa.

Dispela agrimen i wanpela pe salari polisi bilong lukim olsem olgeta tisa mas kisim rait pe na mekim wok bilong ol long tisim ol pikinini.

Nesenel Presiden bilong PNG Tisa Asosiesen Tommy Hecko long sainim bilong dispela agrimen i tok ol tisa i baksait bun bilong kantri.

Em i tok long hap we i nogat arapela ol Gavman sevis bai yu lukim olsem ol tisa tasol i stap na dispela i soim hatwok ol i save mekim long skulim ol pikinini.



• Hatwok i karim kaikai; Beatrice Solok i bin kisim Daks prais bilong Gret 12 . Hia Beatrice i sanap wantaim wanpela tisa na kisim prais bilong em long han bilong Hetmasta Simon Kenehe long taim bilong greduesen. Prais em K2,000 we BSP i sponsaim na ol i prisenim Beatrice wantaim akaun long benk ol i opim wantaim K2,000 prais mani.

UOG kirapim pait agensim HIV/AIDS

Desney Koimo i raitim

NAU yet long PNG, planti ol manmeri na ol pikinini tu i wok long kisim bikpela bagarap, we planti ol i dai pinis na planti ol arapela i wok long raun yet wantaim dispela binatang long bodi bilong ol we em i isi tru long ol i ken givim i go long ol arapela lain husat i nogat dispela binatang taim ol i slip wantaim i go i kam.

Planti taim long ol edukesen na awenes kempen program, yumi i save harim olsem HIV/AIDS bai i no inap long givim sans long yu wanem kain man, meri o pikinini.

Planti ol man i nogat meri na wankain tu long ol meri we man bilong ol i lusim laip bilong ol long wanem ol i kisim sik HIV/AIDS. Na planti ol pikinini tu i nogat mamapapa (orphaned) long wanem ol i painim HIV/AIDS na i dai pinis.

Em i samting bilong sore, tasol kain pasin bilong laip i ken lukim planti ol lain i go daun yet wantaim dispela sik HIV/AIDS sapos yumi i no inap was gut long abrusim dispela sik.

Isten Hailans em i wanpela provins long kantri we i mak bilong ol manmeri wantaim HIV/AIDS i wok long go antap Moa yet. Bikos long dispela, ol sumatin long wanpela bikpela institusen, em Yunivesiti ov Goroka (UOG) i kamap wantaim tingting long kamapim ol awenes na edukesen program na ol i ken skulim ol arapela sumatin na ol wokman na meri long UOG na ol arapela lain long bagarap na hevi em sik ya i save kamapim.

Dispela HIV/AIDS awenes na edukesen program i kisim gutpela sapot i kam long ol ajensi, ogenaisesen na ol lain husat i go pas long pait agensim sik HIV/AIDS. Nau yet 16-

pela sumatin long Studen Sevis Divisen husat i bin karimaut blut tes long Goroka Bes Jeneral Haus Sik i go pas long karimaut ol wok voluntia long statim ol wok long kaunseling na tu kirapim tingting bilong ol arapela sumatin long kamap na kisim ol blut tes na tu kirapim ol wok awenes kempen na edukesen program long UOG kempas.

"I luk olsem UOG i go pas nau long developim HIV/AIDS program long glasim na skelim (Screening programme) long wanem i nogat narapela institusen long PNG i gat kain program," Vais Sansela David Rawlence i tok long taim klinik long UOG i kirapim (sero surveillance) senta long kempas. Dispela senta bai kamapim planti kain kain wok awenes na edukesen we ol i lukluk strong long daunim dispela sik namel long sampela ol popule-

sen grup we ol i luksave olsem ol i stap long risk.

UOG i luksave tu long hatwok em Studen Sevis Divisen Dairekta, Ms Monica Pusal na Kaunsela bilong ol meri sumatin Ms Judy Towadong na Yunivesiti klinik dokta - Sivanyanga Jeyatharan husat em ol i wok hat tru long sait bilong edukesen na prevensien.

Ol tripela meri ya i wok strong long karimaut ol wok long leksa long pablik (public lecture), soim ol piksa long video, givim aut ol niusleta na sindaun na skulim ol wan wan manmeri long kempas insait long las 8-pela wik. Mis Towadong i karimaut gutpela wok kaunseling we em i givim toktok long pasin bilong kisim blut tes na Dokta Jeyatharan i karimaut ol wok bilong kisim ol blut na karim i go daun long Goroka General Haus Sik long testim long hap.

De bilong stopim birua long ol meri

Desney Koimo i raitim

PLANTI ol man na meri i no save gut yet long mining bilong vaiolens egensim ol meri na pikinini we i save bagarapim sindaun insait long famili.

Ol sumatin, welfea grup, yut na grup blong ol meri i bin kamap long makim bikpela de bilong pait na birua long ol meri insait long kantri wantaim bikpela mas long ol rot insait long Pot Mosbi.

Pait na birua long ol meri i bikpela samting long wanem ol meri tu i gat wankain rait olsem ol man. Presiden bilong

ol meri insait long Mosbi Not Is Theresia Pakii i tok olgeta yia ol manmeri i tek pat long dispela bikpela de long bringim awenes long rait bilong ol meri we em i laikim luksave bilong Gavman long dispela samting. Ol meri i laikim respek i mas stap insait long famili bikos gruk pasin i save kamapim violens.

Consultative Implementation and Monitoring Council (CIMC) husat i go pas long dispela de i givim aut ol posta bilong mekim ol lain i luksave olsem lo bilong vaiolens i senis pinis.

Pablik Prosekyuta Chronox Manek husat i

bin kamap long dispela de i givim sapot bilong em long stop pasin vaiolens insait long famili. Em i tok vaiolens em i wanpela samting we i save lukim planti meri i go insait long kalabua bikos ol i pilim pen long skin na kilim man bilong ol.

Mista Manek i tok liklik samting we i kamap insait long famili em famili yet i mas stretim na noken bringim hariap i go long polis we ol bai i go kalabus. Pasin bilong stretim toktok mas stap namel long famili.

Sapos dispela i kamap bai mipela i ken lukim senis tu i kamap insait long kantri.

Skul bilong Marasin na Helt Saiens kisim liklik baset mani tumas.

BASET mani Gavman i givim go long Skul bilong Marasin na Helt Saiens bai i no inap long ranim gut planti progrem na tu bai katim daun namba bilong ol sumatin i go skul long 2005.

Eksekutiv Din bilong Skul Profesa Mathias Sapuri i tokaut long dispela bihain long Gavman i tokaut long baset mani go skul we i daun stret long baset mani bilong las yia.

Gavman baset long las wik i tokaut olsem UPNG bai kisim mak olsem K29 millien we i antap long baset bilong las yia. Tasol mani we bai go long Skul bilong Marasin na Helt Saiens em K4.6 millien.

Dispela i K1.7 millien sot long baset bilong las yia we skul i kisim K6.4 millien.

Profesa Sapuri i tok skul i pilim olsem Gavman i no mekim gutpela pasin long wanem skul bilong Marasin na Helt Saiens i wanpela bikpela skul insait long kantri we i save trenim na kamapim gutpela ol wokman na meri insait long helt sekta.

Skul bilong Marasin na Helt saiens i skul we i save kamapim ol save man na meri bilong Helt wokfos insait long kantri na ol mas painim rot bilong kisim mani na ronim skul.

Dispela bai lukim skul i katim daun namba bilong ol Gavman spona sumatin na kisim ol praivet spona o ovasis sumatin we i ken baim pul skul fi.

Skul fi bilong dispela kain ol sumatin em K27, 000 na sapos ol i kisim planti bilong dispela kain ol sumatin bai skul inap long lukautim kos bilong ranim ol arapela program tu insait long skul.

Long olgeta yia skul i save kisim 200 Gavman spona sumatin i kam insait long skul tasol nau bai ol i katim daun long 26 pesen we bai lukim 150 sumatin tasol. Arapela 50 em skul i luktuk long kisim ol ovasis o praivet spona sumatin bikos ol bai baim pul skul fi olsem K27, 000.

Profesa Sapuri i tok Nesenel Helt Plen bilong 2001 igo 2010 i wanpela Gavman pepa we i tok klia long trenim planti moa dokta, nes na ol arapela helt woka. Tasol dispela mani plen bilong neks yia bai stopim dispela long kamap.

Gavman nau i mas luktuk gen i go insait long dispela baset plen bilong em na kamapim gutpela disisen bikos skul i traime long inapim dispela Nesenel Helt Plen (2001-2010) long bungim dispela mak Gavman i laikim long Helt wokfos bilong en.

Senis long rot bilong makim ol gred 11

NESENEL Edukesen Bod (NEB) i bai senisim rot ol i save makim ol gred 10 sumatin long i go wokim gred 11 long ol Sekenderi na Nesenel Hai Skul insait long kantri.

Siaman bilong NEB Peter Baki i tok ol bai selektim ol sumatin tru long wanpela komiti. Olgeta memba insait long dispela komiti em ol hetmasta bilong skul husat i save kisim ol gred 11 we wanpela opisa bilong Sekenderi Edukesen na Open Lening seksen bai ranim.

Sumatin we ol selekim bai kism tok orait long Nesenel Edukesen Bod tru long Seketari bilong Edukesen olsem siaman.

Dispela komiti bai kisim lis bilong ol sumatin husat i mekim gut gred 10 eksem bilong em we kisim gutpela mak na i putim long skul liva fom bilong em olsem 'NHS Gred 11 olsem namba wan. Ol bai luktuk tu long ripot bilong sumatin insait long skul.

Ol bai kisim pastaim ol gred 11 i go insait long ol sekenderi skul na bihain long ol Nesenel Hai Skul. Klostu long 70 pesen bilong ol sumatin bai kam long provins we nesenel hai skul i stap long en na narapela 30 pesen bai kam long ausait.

Seleksen o makim bilong ol gred11 bai stat long dispela wik we bai kam aut long Jenuari na ol sumatin wantaim ol papmama i ken save.

Lo na Jastis section

Rot bilong holim man - stat bilong bikpela hevi

Pipels Eksen Komiti painimaut long ol ripot i kam olsem ol pipel i no amamas tru long pasin polis i save holim ol lain ol i ting i mekim trabel.


Planti taim polis i holim wanpela man ol i save kam wantaim trabel na pait na komyuniti no save wanem samting i kamap na polis i mekim olsem. Planti taim polis i no save holim man tasol ol i save salim man o meri i go

bek long komyuniti long stretim. Ol lain polis i holim ol i no save kisim toksave long raits bilong ol. Dispela kain pasin bilong mekim nabaut o paitim ol manmeri na holim ol i no save oraitim pasin tru bilong Melanesian sistem long luksave long dispela samting.


Turangu man o meri ya i save sem long kot na i nogat sans long tok sori na planti taim

komyuniti i stap wantaim belhat na kros na bruk namel long ol yet.

Pasin bilong kalabusim ol lain we ol bai kisim save long banis kalabus i no save helpim ol lain na i save westim taim sapos man ya i lusim komyuniti na i go kalabus na i nogat rot o pasin bilong stretim bel na sindaun bilong em wantaim ol lain long komyuniti.



Ol i save mekim nabaut long saspek na kisim em. Saspes i no save long raits bilong em. Famili memba na komyuniti i no save long wanem samting i kamap..



Pasin bilong kot i nupela long em na ol i tok Inglis. Ol i no save kisim helpim bilong lo na kisim sem long ai bilong kot. Em i kisim taim long sas bilong em. Ol i no luksave moa long raits bilong em.



Em i kisim taim long kalabus. Sapos em i no toktok wantaim komyuniti Bai wok bilong stretim komyuniti bai hat .


Papua Niugini i gat we bilong daunim drag

LO bilong Papua Niugini Gavaman i stopim drag i stap pinis. Olsem na taim polis i lukim man i smokim o karim mariwana bai polis i holim em na sasim em long kot. Na long olgeta keis bilong drag bai man i go stret long kalabus.

Tasol polis em i no wanpela gavaman dipatmen husat i ken go pas long wok bilong daunim hevi bilong drag. Hevi bilong drag i save kisim planti ol arapela dipatmen tu. Welfea em i narapela. Kot system, Yut na Hom Afeas, Helt, Edukesen, Difens, Kastoms, Koreksinel Sevises, Agrikalsa. Na i kam daun yet long ol pipel insait long komyuniti na famili.

Wanpela gutpela we em i Edukesen na awenes. Dispela i min olsem skulim ol manmeri long luksave long drag i wanpela samting bilong bagarapim man long kamapim gutpela sindaun insait long famili na komyuniti.

Trening i sut long givim skul long manmeri long lainim na



Sevis Bilong Helpim Wantaim Bernard Malle

kisim save long we drag i wok insait long komyuniti. Wanem kain we drag i save kamap ples klia na wanem kain rot drag i save kamap sua long wanpela kantri na go long narapela. Husat inap long karim aut wok bilong kamapim na salim drag na husat inap long baim na yusim drag. Long trening man i ken kisim skul long painim rot tu bilong stopim na pinisim hevi bilong drag long kantri.

Olsem Drag Edukesen, Awenes na Trening i sut long helpim planti manmeri, pikinini na yut long ol ples, skul, hausik, long ol kot, polis, CIS, Difens, Kastoms na komyuniti, hauslain na famili. Wantaim gupela save na tingting manmeri na pikinini i

ken mekim wok bilong daunim pasin nogut bilong drag i wok long bagarapim kantri.

Kantri inap long lusim planti mani bikos drag hevi i wok long bagarapim ikonomi. Long haus kalabus na long hausik gavaman i wok long lukautim ol sikman meri husat i painim sik long drag.

Planti hap bilong kantri ol fama i rausim ol kes krop olsem kofi na ti long graun na planim mariwana. Bikos i nogat kofi o ti dispela i min olsem bai kantri i sot long mekim mani long ol agrikalsa sekta na sapatim ol gutpela wok insait long kantri.

Planti pipel i sot long gutpela kaikai long graun bikos ol nau i planim mariwana long graun i kisim ples bilong kaikai. Na taim man na meri i no kaikai gut ol i sot na sik i painim ol.

Ol i dai long hangre. Yu bai lainim ol dispela na kisim save long Drag Edukesen, Awenes na Trening, we em inap long helpim yu long daunim drag hevi long ples bilong yu.

Krais tasol rot i go long God

Dia Edita.

Inap yu givim mi liklik spesim long Wantok Niuspepa. Mi save harim na ritim Wantok Niuspepa olsem planti manmeri i save tok nogut na bagarapim ol sios.

Mi i no save lotuim god bilong Israel o Momosn o Indus o mekim wanpela dei holi o malolo. Mi skul mangi tasol save ritim buk olsem World Religions, 66 Buks bilong Holi Baibel olsem stori buk nating.

Planti manmeri tok Jisas Krai i dai long rausim sin soim rot na rausim olupela lo na Sabat. Sapos yu i gat save olsem King David o Solomon o profet Daniel bilong bipo, orait kam gut long Wantok Niuspepa na kliarim laip stori bilong Jisas na Sabat wantaim olupela lo.

Mi ting God bilong Israel i salim wanpela pikinini Jisas bilong Nasaret long yumi bihainim lek mak na

pasin bilong em. Sapos yumi kalapim lek mak bilong Jisas liklik tasol yumi brukim tok bilong God na sin na abrusim lek bilong Jisas. Sapos yumi laik lotuim God long dei bilong Jisas, okei lukim laip stori bilong Jisas long Matyu, Mak, Luk na Jon. Orait bihainim wanem dei Jisas save bihainim bikpela dei bilong God yet na go autim tok long haus lotu. Yumi bihainim dispela dei tasol, i nogat narapela rot, Jisas tasol em rot long God.

Sapos yumi paol long Fraide, Sarere o Sande o dei siks dei seven o dei wan, okei openim English Dictionaries na painim aut na save long mining na lain ap bilong dei.

Sapos yu wanpela i laik salim baibel teks o toktok moa long dispela yu welkam tasol long nem bilong God bilong oltaim oltaim.

PETER MUKI LAE

Arapela bilip bai paolim planti kristen

Dia Edita

Mi gat bikpela wari tru long dispela kantri bilong yumi PNG. Long Oktoba Wantok Niuspepa mi bin kirap nogut tru taim mi lukim olsem lotu Moslem i gat ol haus lotu bilong em long Mosbi na ol sampela provins bilong kantri.

Mi gat bikpela pret tru long planti kristen bai paol na bihainim ol long lotu bilong ol. Mi save olsem dispela lotu i no kamap long God. Tasol kamap long man nating bilong dispela graun.

Tasol long gris pasin bilong ol bai ol i ken paolim planti kristen long bihainim ol. PNG i save tok dispela kantri em i kristen kantri tasol sori tru planti taim dispela i no soim long ol eksen bilong yumi ol kantri man. Ol man nogut i paolim tingting bilong ol kristen.

Lukim Baibel 2 Peter 2:1-2 na Jud 3: 4

CHRIS SERY MADANG

Ol kongkong tasol karim hos masin i kam

Dia Edita

Mi laik raitim pas i go long Wantok Niuspepa na komplein long wai na ol hos reis masin na pasin pamuk i wok long kamap bikpela long Pot Mosbi siti long ol nait klab.

Ating planti ol kongkong man em ol lain long Esia i kam na bagarapim kantri bilong mipela pinis long pasin pamuk. Dispela Nesanel Gavman i putim o mekim laisens bilong pasin pamuk long Papua Nugini o nogat.

I gat ol yangpela ol pikinini meri husat kris-mas bilong ol 14 o 15 i save wok long ol nait klab na bihain ol i save karim ol pikinini nating.

Bilong wanem na dispela ol pasin pamuk i save kamap na ol ai bilong ol politik man i pas yet. Mi ting Gavman mas stopim ol dispela nait klab long wokim ol doti pasin bilong pamuk na kamapim bel long ol pikinini.

JOHN KRISOAKI WEWAK, ESP

Salim pas i kam long WANTOK Niuspepa P.O. Box 1982, Boroko, PNG

Sauten Hailans i stap las yet

Dia edita

Mi laik sapatim na helpim sampela tingting bilong John Wakiria, Para Viles long Tari SHP i bin kamap long Wantok Niuspepa Oct 28, 2004, het tok em i raitim olsem; '9-pela memba bilong SHP ol i stap we?'

Yes John, mi laik toktok long Hela lida bilong mitupela yet, Koroba Kapiago lida na Tari Pori lida ol i wok long kot na pait olsem pikinini ol i pait long loli i stap. Yumi Hela pipel i leit pinis long olgeta sevis na las tru. Sindaun bilong pipel i nogut tru olgeta sevis nogut na pipel i kisim taim i stap.

Sapos ol dispela lida ol i lida tru, ol i no inap pait long pawa na namba bilong ol yet. Olsem nau ol i mekim i stap.

Ol bai tingting long pipel sevis na wok wantaim long wanpela man husat i win pinis. Pipel yet votim pinis na em inap. Namba tu samting pawa bilong makim gutpela lida na loli lida tu i stap long han bilong pipel bilong Hela yet.

Nau dispela 5-pela yia taim bilong Hela i nogat sevis, bikos ol loli lida bilong yupela ol i pait long loli bilong ol i stap (ol pawa na namba) na hau bai yumi kisim sevis. Ol dispela loli lida i yusim Hela pipel, olsem wanpela praivet bisnis bilong ol yet, laka?

Sapos Hela pipel lainim gutpela skul pinis long ol loli lida. Orait 2007 yupela i mas makim gutpela lida tru. Kisim sam-

pela gutpela tingting bilong foma Hela lida olsem Sir Matiabe Yuwi, Andrew Wapira, Elo Payale, Alfred Kaiabe, Anderson Agiru na sampela gutpela komyuniti lida tu i stap.

Toktok na wok for Hela for Hela, yupela i mas glasim gut pastaim na makim tru lida na i no loli lida. Loli lida ol bai tingting long loli bilong ol, na ol i no inap tingtim yupela na sevis.

Olsem John yu tok pinis "taim bilong kisim vot ol i kam olsem stilman, na kisim vot pinis ol lus tingting long promis ol i bin mekim long pipel bilong ol". Namba tu samting yu tok long "Mendi taun bilong yumi i kamap olsem distrik taun, pait na kilim man i go bikpela long SHP.

John yu tok tru olgeta. Mendi em i bik-taun bilong yumi pipel bilong Sauten Hailans, tasol bipo long mitupela i go na klinim Mendi taun, mitupela i mas klinim Tari taun pastaim. Tari, em i namba tu taun bilong pipel bilong SHP.

Tari i stap klin na i nogat wanpela pipia. Nau mitupela i go klinim Mendi taun na tokim ol pipel bilong Mendi olsem no ken pait na kilim man nambaut na bagarapim Mendi taun bilong yumi pipel bilong SHP laka!

Tru tru mipela Hela pipel pasim tok na lusim pait na kilim man i dai pasin olgeta na wok bung wantaim long kirapim na klinim Tari taun. Na ol distrik olsem Koroba, Kapiago, Komo, Magarima na

mipela i go tokim ol pipel bilong Mendi olsem yupela tu lusim pasin bilong pait na kilim man i dai, kam na yumi olgeta wok bung wantaim long klinim Mendi taun bilong yumi.

Tru tru ol bai harim tok bilong yumi, bikos ol i lukim piksa long yumi Hela pipel i senis tru tru. Na lusim ol pasin bilong pait na tingting long developim Hela. Yumi yet i no lusim pasin bilong pait na kilim man. Ol pipel bilong Mendi tu i no inap harim yumi na lusim pasin bilong pait na kilim i dai man.

Nogat wanpela autsait man bai i kam na senisim Hela nogat tru. Hela yet mas senisim Hela na mas wanbel na wok bung wantaim. Dispela we tasol Hela bai senis. Histori bilong PNG namba wan man PNG husat baim balus na ranim em man Hela, mangi long Kupari.

Hela pipel wantaim Hela lida wok bung wantaim na lusim rabis pasin bilong pait pait na politik tumas. Nau yumi i stap long Indipendens taim i no taim bilong tum-buna, olgeta arapela provins ol i no wetim yupela ol i go longwe pinis, Hela yupela i stap las tru long sevis. Long helpim na strong bilong God yupela Hela bai win. Sapos yu i gat askim o bekim rait long Wantok Niuspepa.

PETER KELO HELA IGIRI SAUTEN HAILANS PROVINS



Sapotim ol meri...

Tenk yu long luksave ol man na yut husat i sapotim pasin bilong rausim hevi long ol meri. City Mission i mas i go long stedium long selebretim Violence Against Womens Day las Fonde.

POSF entaitolmen em tok nating long pepa

Dia Edita

Mi laik autim dispela komplein long pablik olsem planti tisa i wok long wetim pei bilong ol tasol ol i no save wanem samting i rong. Ol mani bilong ol i stap long POSF na ol i pulapim sepeseesen autoriti fom pinis tasol nogat samting i kamap long POSF. Mi bin painimaut olsem dispela ol wokmanmeri bilong Pesenel seksen bilong Edukesen Salaris i save kisim sait

mani long mekim wok bilong ol. Dispela i min olsem ol i kisim dabol pei.

Mi bin painim aut tu olsem 6-pela fail bilong ol tisa i bin lus bikos wanpela wok meri i bin bagarapim long taim ol i bin rausim em long wok.

Dispela i sampela asua bilong sampela tisa i wet long POSF mani bilong ol. Mi laik askim ol wokman bilong pesenel (Ed/Sal) long wok wantaim ol temporeri

fail long stretim wari bilong ol tisa. Mi nau askim opis bilong Ombudsman Komisn na Transparensi Intenesenel long pulim ol dispela lain pablik seven ples klia bai pipel ken luksave. Mi askim tu ol pablik long ol bekim bilong yupela.

THOMAS MORE BANZ WESTEN HAILANS PROVINS

Kabwum distrik nogat sevis

Dia Edita

Mi pikinini Kabwum mi laik autim wari bilong mi olsem, yumi save rong long senisim ol memba o votim narapela. Yumi i no laik holim pasim wanpela tasol long mekim wok i go.

Planti yia i go na i nogat sevis liklik kamap long Kabwum, olsem bikpela haus sik bilong Kabwum em Etep helt senta i no Butaweng em long Finsafen, olsem na nau long dispela taim 2005 baset o mani


plen Gavman nau i lukluk long givim moa mani i go long ol provins.

Olsem na harim gut, memba bilong Kabwum Bob Dadae em i wokim gut wok tasol mi laikim 2005 baset em mas mekim sevis olsem mentenens long Songo haus sik i go bikpela, bildim nupela haus sik long Etep na yumi i noken i go antap long Butaweng.

Na tu rot i nogat mentenens, bus karamapim, graun i bruk na pasim rot na

yumi hat long i go long Etep haus sik na i stap long Kabwum tasol na bungim hevi. Mi stap long Mosbi na krismas tasol mi save kam na lukim dispela hevi yupela ples lain em yupela save i stap kaikai na wok wantaim na yupela orait. Em tasol husat man o meri laik bekim rait tasol long Wantok Niuspepa na mi lukim.

PATRICK N. NOWONG BADILI



WANTOK
KOMENTRI

Opim moa vokesenel skul

Gutpela long harim olsem skul fi bilong ol pikinini long neks yia bai i stap wankain yet olsem dispela yia. Tasol long skul fi bilong ol pikinini i go insait long ol vokesenel, nesanel hai na ol koles na yunivesiti tasol bai abrusim mak bilong K1000 i go antap.

Klostu long K5000 mak. Em i gutpela long edukesen bot i putim aut dispela toksave i kamaut hariap bai ol papamama i ken luksave na redim ol yet long nau i go bai ol i noken ron i go i kam long taim skul i laik stat long mun Februari long neks yia.

Tasol bikpela senis nau em ol turangu pikinini bilong yumi long ol gret 10 i mas abrusim dispela level na i go long gret 12 bikos ol bai i nogat sans long go insait long ol kolis o trening skul olsem bipo. Nau bai ol dispela kolis i kisim tasol ol gret 12.

Em i tru dispela system em olpela long bipo yet i kam na i mas gat senis. Wanpela gutpela samting em dispela inap apim level bilong save na salens namel long ol famili na pikinini long skul strong long winim ples long gret 11 na 12.

PNG i no inap stap wankain wantaim olpela level bilong save na edukesen tasol. Mipela i mas go het na gutpela long ol sumatin i mas luksave long salens na narapela level ol i mas winim.

Dispela tu inap opim dua long planti praivet skul long kamap long kisim ol gret 10 husat i abrus we ol i ken surukim save bilong ol moa o stretim gut ol mak bilong ol long kamap long gret 12 mak long edukesen level bilong ol.

Wanpela samting nau em gavman i mas opim planti vokesenel skul bilong skulim ol manki long sait bilong lainim long wok kapenta, mekenik, plama, fama long gaden na ol kain wok ol yet i ken mekim taim ol i stap long haus na komyuniti bilong ol.

Dispela inap mekim ol pipel yet i yusim save na han bilong ol long mekim wok bilong ol yet.




Bai salim tingting long stap long Oposisen o Gavman

Las wik mi stori long wanpela pait i bin i bruk namel long ol lain asples Moge na ol Isten Hailans long Mt Hagen, we planti manmeri i kisim bagarap. Dispela pait i kapsait i go tu long Goroka we ol lain Isten Hailans i tingim ol wantok bilong ol i kisim bagarap long Mt Hagen, na blokim ol PMV bas na paitim ol lain long Westen Hailans i raun long Lae na Madang, na i laik go bek long Mt Hagen. Planti ol PMV bas na ol pasindia i bin hangamap long Lae.

Ripot i tok olsem ol lain Isten Hailans tu i ronim ol lain Westen Hailans, Enga na Sauten Hailans husat i stap long Goroka.

Taim dispela hevi i kamap long Mt Hagen, mi bin tok olsem pasin bilong laikim na respekim laip na propeti bilong ol narapela manmeri em i bikpela samting. Na tu, mi bin tok olsem yumi mas lainim long wok na stap wantaim ol narapela manmeri bilong Papua Niugini. Mi bin tok moa olsem nau edukesen sistem i kamap na planti manmeri i go skul, painim wok na mekim bisnis longwe long ples bilong ol.

Las long en, mi bin tok olsem, sapos yumi i no inap long stap pas wantaim ol manmeri bilong narapela hap bilong PNG, em yumi mas kolim yumi yet, op kat bilong sosati. Dispela tabel long Mt Hagen las wik i bin stat bihain long sampela as ples mangi bilong Moge i bin stillim wanpela sen su bilong wanpela liklik boi bilong Isten Hailans.



TOK PISIN
wantaim
PETER MAIME

Tenkyu long ol polis na ol komyuniti lida bilong Mt Hagen na Isten Hailans long wok bung wantaim na i bin daunim dispela tabel. Nogat bai dispela hevi i go bikpela.

Narapela hap stori bilong dispela wik, yumi go bek gen long Novemba sindaun bilong Nesenel Palamen. Las wik, Oposisen i bekim toktok long 2005 Nesenel Baset bilong gavman. Oposisen Lida, Peter O'Neill i tok gavman long dispela baset i no putim inap mani long lukautim ol liklik manmeri long ples. Em i tok gavman i no putim inap mani i go long ol provins na distrik long dispela K4.7 bilien baset.

Wanpela samting i luk krangi liklik em, gavman i no givim inap taim long ol memba long toktok long dispela baset long floa bilong palamen.

Bihain long Mista O'Neill i bekim toktok long baset, narapela tupela oposisen memba i givim tingting long baset em Gavana bilong Morobe na Galf Provins, Luther Wenge na Chris Haiveta. Bihain long tupela, gavman i hariap long muvim mosin na pasim baset bilong 2005. Oposisen i belkaskas long dispela pasin

bilong gavman na i kisim edvais long ol loya long kotim gavman.

Tasol olsem mi i bin tok las wik, i luk olsem gavman bilong Somare bai i stap yet. Gavman i tok long 2005 Baset, na baset ya i kisim tok orait pinis long palamen bikos gavman i gat namba. Na sapos gavman i gat namba long pasim baset, em tu bai gat namba bilong daunim vot i nogat bilip sapos oposisen i sanapim wanpela long palamen.

Wanpela samting i klia nau em, Gavman i wok long surkim namba bilong em i go antap. Memba bilong Mosbi Not Is na Wabag, Casper Wollom na Sam Abal, husat i winim bai-ileksen i tok aut olsem, tupela bai joinim gavman bilong Somare.

Mista Wollom husat i resis ananit long pati bilong Mista O'Neill, Pipels Nesenel Kongres (PNC), i tok ol votas bilong em i no kisim sevis long 5-pela yia na em i laik stap wantaim gavman na bringim sevis i go long ol votas bilong em.

Mista Abal i mekim tupela toktok. Wanpela em i tok, em bai stap wantaim Somare gavman na namba tu em i tok i em i gat bikpela wok long daunim ol planti trabel pait insait long ilektoret bilong em.

Planti ol memba bilong palamen nau i tingting long bringim ol sevis i go long ol ilektoret bilong ol, bikos 2007 Nesenel Ileksen i kam klostu. Dispela bai mekim ol memba i salim tingting planti long stap long oposisen o long gavman.

WANTOK

Published Weekly, Wednesday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: 325 2500
Fax: 325 2579
Email: word@global.net.pg

Pe bilong wanpela yia
52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kill

Word Publishing Company Limited is owned by the four major churches of Papua New Guinea: Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Editor
Yakam Kelo

Published by Jeremy Burgess and printed by Pacific Star-P.O. Box 6817 Boroko NCD at allotment 13 section 38 Waigani drive, Port Moresby

Mipela tingting planti husat bai kamap lida

Yumi mas bihainim tingting bilong Baibel

Long Papua Niugini i gat planti manmeri i tingting planti na i laik save wanem kain man o meri i mas kamap lida na sti-aim kantri bilong yumi na long sios bilong yumi tu.

Ol kristen i laik painim ol gutpela lida bilong strongim sios na kantri bilong mipela Papua Niugini.

Long buk holi Baibel Bikpela Jisas Kraus i tok yumi mas was



OL PRINSIPOL BILONG GUTPELA LIDA
wantaim
Pastor na Evangelist OHARE

gut bai manmeri tasol i kamap lida. yumi makim ol gutpela lida

Dispela toktok bilong ol prinsipol bilong gutpela lidasip long Wantok Niuspepa i ken helpim yu i ken save olsem Papua Niugini lida em i wanem kain man o meri i bosim yu.

God i singautim yumi lida long kamap lida na yumi mas kamap lida tru tru. Jon 1: 43-50.



Bris bai sanisim laip

Afganistan:
Wanpela polisman bilong Afganistan i sanap klostu long wanpela nupela bris

we i joinin sauten Afganistan wantaim Iran. I gat bilip olsem dispela bris bai bringim sampela gut-pela sanis long laip bilong ol pipol long sauten Afganistan we hangere em wanpela bikipela hevi.

Kofi Bia

Inglen:
Ol lain husat i save mekim bia long Britain i painim wanpela wei long kisim sapot bilong ol manmeri husait i save laikim tumas long dring kofi. Ol i mekim wanpela nupela bia wantaim ol kofi bin.




Longpela a Diwai Stret

Lisbon:
Dispela Krismas diwai em wanpela tasol we i longpela tru long Yurup. Em i stap long name) bilong wanpela 16th sentri monestri bilong Jeronimos long Lisbon. Em i 60 mitas o 20 stori hai na mak bilong 2 milien lait i bilasim em.

Ol man painim 7-pela femili long bikbus bilong Kembodia



Kembodia:
Ol refiugi (ol manmeri husat i ron-awei na hait bilong wanem ol i pret long wo) i karim wara go bek long kemp bilong ol we i stap klostu long O Bei Thap, wanpela taun bilong Kembodia. Ol man i painim 7-pela Kembodia femili hait insait long bikbus bilong Kembodia. Dispela ol femili i bin pret long wo na go hait long 1979 taim ol ami bilong Vietnam i bin go long Kembodia. Ol i no save olsem ol Vietnam ami i lusim Kembodia 15 yia i go pinis inap ol man i painim ol na toksave long ol.



Nupela lo i stap long yusim bebi i no bon yet long stadi

Switzaen:
Ol tramper long Switzaen i tok olsem wanpela nupela lo we bai lukim ol dokta i yusim ol stem sel bilong ol bebi i no bon yet long stadi bilong ol. Dispela foto i soim ol stem sel



"Mama" i stail tumas

Wanpela wol sevei i painimaut olsem "Mother" o "Mama" em i stap nambawan long olgeta biutiful wod long Inglis tok ples. Em i go pas long ol kain wod olsem passion, smile, love na eternity.

Mobail Fon o Bom




Amerika:
 Michael Sathre, husait i gat 13-pela krismas i holim ol pipia bilong mobail fon bilong em long haus bilong em long Kalifonia, Amerika, long 12 Novemba. Long Ogus dispela yia, Michael i bin kisim bagarap long yau na han bilong em bihain long betri bilong fon bilong em i bin pairap olsem bom. Ol sefti opisol bilong Amerika i tok olsem ol i kisim 83 ripot i kam long ol man-meri husait mobail fon bilong ol i pairap olsem bom bilong wanem betri o charger bilong ol i bagarap.



Elektrik Gan


Austrelia:
 Dispela man i holim wanpela gan ol i kolim 'Taser'. Dispela gan i no save yusim ol bulet, em i save yusim elektrik shok. Ol polis bilong Austrelia bai bihainim Yunaited Stets ov Amerika na givim dispela ol elektrik gan long ol polisman husat i save wok long balus long yusim.

NIUS



Ol dolfin savim laip

Niu silen:
 Tupela dolfin bilong Risso i swim klostu long wanpela ples long Jepen ol i kolim long Taiji. Sampela dolfin i bin savim laip bilong ol man long notisten kos bilong Niu Silen bihain long wanpela sak i laik.



Bilong ol meri

Spain:
 Ol manmeri i holim ol kadbod we i makim ol meri bilong Spain husat i save stap long pret o kisim bagarap long ol man bilong ol o arapela ol man. Ol i mekim olsem long makim Intenesenet Dei Agens Abuse long ol meri long Seville.



Demdem i putim tupela man long koma






hailen:
 Upela man long Thailen i stap long koma nau bihain long ol i kaikai demdem ng Taiwan.

Sik nogut bilong ol pisin bagarapim Esia

Vietnam:
 Wanpela meri bilong Vietnam i skelim pato long wanpela maket long Hanoi. "Bird flu virus" o wanpela sik nogut bilong ol pisin we i kamap long Esia i mekim ol man i kilim moa long 100 millen pisin. Dispela sik nogut i kilim tu 32 pipol bilong Vietnam na Thailen long dispela yia.



Konfemesen blessing long TOWAMO Lutheran Sios long Mosbi



OI POTO: YAKAM KELO

Bikpela wok Eda Ranu i wokim long saplaim wara long Mosbi siti

Maisan Pahun
i go raun long Maunten Eriama na lukluk long wei ol i lukautim wara bilong Mosbi siti.

Maisan Pahun i raitim

Planti manmeri long Nesinol Kapitil Distrik (NCD) i save yusim wara saplai na ting olsem wara em isi samting long kisim na yusim nating. Dispela em i trupela toktok bikos planti hap ples insait long Papua Niugini i gat free wara na ol manmeri i save usim long laik bilong wanwan long kainkain wei.

Tasol hia long NCD na ol narapela bikpela town insait long kantri, wara em wanpela samting bilong baim. Long NCD yet olgeta house i gat wara paip mas i gat wanpela wara mita wantaim. Sapos wanpela haus o manmeri i usim wanpela wara paip i nogat mita long em dispela em i illgel na dispela man o meri i ken go kalabus.

Eda Ranu em wanpela gavaman subsidiary kampani we i save saplaim wara i go long NCD. Eda Ranu tu i save rausim olgeta sewerages sistem bilong siti i go out long Waigani swamp na Paga poin autsait long siti. Tasol pastaim long ol i rausim ol sewerages Eda Ranu i gat ol kemikol plant we ol i rausim ol nogut rabis na wara tasol i save go aut.

Wara NCD i save usim i kam antap long Sirinumu Dam. Dispela dam em ol Papua Niugin Pawa (PNG Power) i save wokim pawa long em. Taim PNG Power i salim wara i kam daun long Rouna pawa stesin ol Eda Ranu i kisim wara na salim i go antap long Maunten Eriama.

Taim wara i kam ol i putamapim tenk antap long mounten Eriama we i gat wanpela bikpela paip ol saveman bilong klinim wara i save kolim well. Bihain long wara i lusim well ol i salim i go long tenk ol i save kolim klarifikesen tenk.


Long klarifikesen tenk ol doti bilong wara i save go sindaun long as blong tenk na klinpela wara i ron igo long filta paip. Long filta paip kainkain dua i stap long paip we i save rausim pipia na kainkain doti long wara.

Bihain tru wara i go long dosin poin we ol saveman bilong wara i kapsaitim klorin igo insait long kilim ol gem na binatang nogut blong wara.

Dispela wara i kam aut long dosin point i gutpela nau long dring. Ol Eda Ranu i gat tupela bikpela tenk antap long maunten we i save bungim wara na bihain salim i go daun long Mosbi siti.

Dispela klinpela wara i save go daun long Mosbi siti we wanwan bikpela tenk i stap long sevim na saplaim ol sababs na setolmen long mosbi siti.

Ol manmeri bilong mosbi nau i save sot long wara na tu sampela taim ol Eda Ranu i save pasim wara bikos nau yet i gat bikpela wok tru i kamap antap long mounten Eriama. Long 1997 Eda Ranu i tekova long NCDC long lukautim wara saplai bilong Mosbi siti. Ol i sainim wanpela kontrak long mekim bikpela wok senis we bai i pinis long yia 2019. Dispela kontrak ol i kolim BOT. Mining bilong BOT em Built, Operate na Transfer.



• Nupela simen haus we ol i wokim ol nupela filta paip i stap bilong klinin ol doti wara na salim klinpela wara i kam go long klorin plant.




• Olpela wel we nau i gat konstraksen wok i stap aninit, yu ken lukim tupela paip i ron long han-kais na han sut bilong wel i sanap stret long namel.

Insait long dispela wok kontrak bai ol Eda Ranu wantaim ol kontraktas bai i wokim ol nupela paip-lain long Rouna 4 i go daun long Maunten Eriama. Na tu long maunten Eriama bai ol i wokim senis long olgeta prosising plant bilong wara saplai.

Dispela bai i kamapim planti wara we i ken saplaim mosbi siti long nau na bihain taim tu.

Bihain taim dispela olgeta wok i pinis long yia 2019 olgeta hap long Siti bai no inap sot long wara na tu ol ples arere long Mosbi siti tu iken kisim wara saplai na planti wara bai i stap yet.

• Dispela em ol olpela filta paip we ol streina i save blokim pipia long klinpela wara, nau yet wara saplai bilong Mosbi i kamaut long ol dispela filta paip.



• Dispela em i klarifikesen tenk namba wan, wara i stap insait em klostu long 100 billion lita olgeta.

CATHOLIC RADIO schedule

Table with 3 columns: Time, Program Name, and Program Name. It lists the radio schedule for Catholic Radio across different time slots from 6:00 to 8:00 AM and 6:00 to 11:00 PM.

Memba bilong yu wok gut long 2004 o nogat?

Wantok Ripota Paul Zuvani i raun na askim ol manmeri sapos ol ting nesenel memba bilong ol i kamapim sampela developmen long ilektoret bilong ol o nogat. Planti ol manmeri i tok ol i no amamas long wanem bikpela hevi bilong ol em rot. Ol memba i not toktok tumas long stretim ol rot.




Inias Natamao

Inias Natamao i bilong Menyamia, Morobe provins na em i wok wantaim Tangalia Sekyuriti Sevises long Waigani. Em i lukim olsem planti samting i no kamap yet long helpim sindaun bilong ol pipel long Menyamia. "Olpele Memba bilong mipela Thomas Pelika i bin wok gut tasol nau Geoka Teta husat i kisim ples bilong em i no wok hat tumas. Bikpela samting em rot bilong mipela long go long ples. Mipela i ken kisim ka long Lae na go long Bulolo tasol long Bulolo na go long Menyamia em i hat. Rot i no gutpela na wanwan taim ol gutpela ka i save ron i go i kam. Rot bilong hevi tu i kamapim ol hevi bilong hausik na skul. I nogat saplai bilong marasin na ol samting bilong skul. Ol skul manki i no lain gut long dispela na tu sampela man i dai nating bikos marasin bilong givim ol i no stap.

Cletus Patewana i bilong Pomio na em tok Memba bilong em Paul Tiensten i tingting tumas long nesenel politik na i tingting tumas long kamapim wok long Pomio ile-toret.

Em i tok ol pipel i gat bikpela belkrai long lukim gutpela rot i kamap namel long Gazelle na Pomio tasol i nogat wanpela gutpela sain i kamap yet long mekim dispela rot i kamap moa gutpela. "Yu save rot em i bikpela samting na memba tu i save long dispela hevi bilong mipela.

Tasol i luk olsem taim em i krungutim nesenel palamen em i givim baksait tru long ol pipel husat i makim em long go insait long dispela haus long pait long kisim developmen i kam long mipela. Mipela i no wari tumas long ol nara-pela samting. Mekim rot i moa



James Mogia

gutpela em i bikpela hevi bilong mipela.


James Mogia em i bilong Sinasina, Simbu provins tasol em i kam stap long 9 Mail, Moitaka Ridge klostu 20 yia na olsem nau em i wok olsem wanpela komiti bilong nau Mosbi Not Is memba Caspar Wollom.

Em i tok kainkain ol politik i mekim na i nogat gutpela wok i kamap long dispela ilektoret. "Moa long tupela yia nau ol pipel bilong Not Is iletolet i no kisim gutpela sevis long gavman. Ol ilektrol developmen fan long mekim wok i no kam insait. Nupela taim taim memba (Wollom) i go insait i gat kot kes we i lukim kot i rausim ileksen bilong em. Orait em wet klostu tupela yia na em i go insait gen long palamen bihain long em i winim bai-ileksen. Planti ol wok olsem stretim ol rot long strit, putim paip wara i go insait long setelmen o pawa dispela i no kamap long wanem i nogat mani long mekim wok. Dispela long wanem memba i no stap long kisim dispela mani na mani i mas i go bek long gavman. Mipela i no yusim mani. Tasol mipela i amamas olsem em i joinim gavman las wik na mipela i hop olsem em bai pait hat long mekim sampela gutpela wok long dispela tupela las yia

Leo Wasei i bilong Yiminum, Nuku Sandaun provins na em i tok i gat planti samting stap yet long memba bilong em, Andrew Kumbakor long mekim. "Mipela i makim Chris Sambre we em i bin stap 15 yia olgeta long Palamen tasol em i no mekim wok. Nuku stesin i go bagarap na ol opis na haus bilong ol wokmanmeri i no stret. Moa yet rot na ol bris i bagarap.

Sindaun bilong ol pipel i no gutpela. Mipela i makim Andrew Kumbakor wantaim tingting olsem em bai luksave long hevi bilong Sambre long abrusim na kisim sampela senis i kam long helpim sindaun bilong mipela tasol i wankain. I luk olsem mipela i makim ol memba long go baim ol haus long Mosbi na stap long Mosbi olsem em i ples bilong ol.

Ating dispela ol memba i no inap stap Nuku, ah? Ol i save long wok bilong ol nogat? Wok bilong ol em long bringim sevis i kam long mipela. Wanem taim mipela bai isi long ron i go long Wewak, Aitape o Angugnak na Lumi long mekim wok bisnis o mekim raun bilong mipela? Memba i mas stretim dispela rot long Mai i kam long Nuku stesin na go moa yet long Seim, Wilwil na Namblo na Mukili.



Paulus Leonard

Paulus Leonard bilong Kompiam-Ambum, Enga provins na em i wok wantaim Workers Mutual Insurance. Em i tok memba bilong em Dickson Maki i no surukim wok em pastaim memba John Pundari i mekim na lusim. "Taim Pundari i stap memba em i bin toktok wantaim Esia Developmen Benk (ADB) tasol nau Dickson Maki i go insait ating em i no toktok moa wantaim benk long stretim rot bilong mipela long Wabag na go long Kompiam. Nau rot i bagarap olgeta na olsem ol kat i no moa ron. Ol man i save wokabaut tupela o tripela de long kamap long Wabag. Dispela i givim bikpela hevi long mipela. Hevi bilong rot i mekim na ol pipel i no kisim sevis.

Vitus Gangon Yagu i bilong Abegini, Mikarew Madang provins na em i tok em i no amamas tumas long wok memba bilong em long Bogia, John Hickey i mekim. "Memba i no wok hat tumas long painim helpim. I gat ol bikpela rot olsem Tangu-Josephstal rot, Mikarew na Bogia-Bes Kem rot tasol memba i no laikim wok hariap long askim ol dona ejensi long helpim stretim ol rot. Em i gat save olsem rot em i bikpel hevi bilong ol mipela na em i save wanem hap em isi long kisim helpim tasol dispela em i no mekim. Mipela i askim memba long em i mas bringim dispela hevi bilong mipela i go long sampela dona ejensi olsem AusAID o JICA long givim helpim. Populesen i stap long dispela ol hap na wok bisnis tu i stap long sampela bilong dispela hap. Sapos rot i gutpela, mipela i inap long helpim distrik long kamapim mani na bringing developmen i kam insait long ilektoret.



Fidelis Maliso

Fidelis Maliso i bilong Kompiam-Ambum na em i wok wantaim Workers Mutual Insurance long Pot Mosbi. Em wantaim brata bilong em Maries Keman i tok ol i bikpela wari long ilekoret bilong ol we nau memba Dickson Maki i no mekim sampela wok kamap. "Nogat ol komyunit helt wokman o tisa long ol hausik na skul bilong mipela. Taim manmeri i sik mipela i save karim long bed long ples na wokabout i kam long Wabag o Yambu hausik long kisim marasin. Na planti taim ol manmeri i dai long rot long wanem rot i longwe. Em i save kisim tupela o tripela de long mipela long wokabaut. Dispel i givim bikpela hevi long mipela. Ol saplai bilong skul tu i wankain. Nogat wanpela sampalai bilong skul i go long ol skul na olsem ol tisa i no moa wok. Taim dispela i kamap ol pikini-ni i no go long skul long wanem i nogat tisa long skulim ol. So mipela i gat bikpela hevi long memba bilong mipela.



Vincent Morea Meaia

Vincent Morea Meaia i bilong Muro, Ihu Galp provins na em i wok wantaim Trukai Indastris long Konedobu. Em i tok em i no amamas tumas long wok bilong memba bilong ol Chris Haiveta i mekim. "Planti ol memba bilong mipela taim mipela i makim ol i save kam stap tasol long Mosbi. Ol i baim ol haus na mekim Mosbi i kamap ples bilong ol na lus tingting long vot mipela i givim long ol. Sapos ol i save long wok bilong ol ol bai traim long bringim ol sevis i go long ples mipela i nidim ol rot, bris na mekim bisnis long pis, timba, kakao, kopi na nau vanilla tasol dispela i no kamap long wanem i nogat gutpela luksave. Planti ol sevis long Kerema taun i bruk daun tu na olsem memba Chris Haiveta i mas pait hat long stretim ol strit na haus bilong gavman. I nogat planti wok bisnis long Kerema tu. Dispela i mekim na mipela i hatwok tumas long baim rot long kam olgeta long Mosbi. Planti bilong mipela i mas ron long bot na bihain ron long ka na dispela i givim hevi long baim bot na ka wantaim. Na taim nogut em i hat long ron long solwara.



Laikim Penpren

Nem: Mick Peter Tolex

Krismas: 16 (man)

Adres: Songura Primary School, PO Box 69, Mendi, Southern Highlands Province.

Save laikim: Pilai spot, ritim stori buk, helpim papamama, pilai gita, harim musik na prea.

Nem: Thema Samalai

Krismas: 17 (meri)

Adres: Mercy Secondary School, PO Box 580, Wewak, East Sepik Province.

Save laikim: Harim musik, go lotu, danis, pilai basketbol, senisim presen, mekim fani wantaim ol poro.

Nem: Evin Saria

Krismas: 16 (meri)

Adres: Mercy Secondary School, PO Box 580, Wewak, East Sepik Province.

Save laikim: Go lotu, pilai ol gem, waswas long solwara, senisim presen, ritim buk, lukim TV na wokim fani wantaim ol pren.

Nem: Max Mayam

Krismas: 18 (man)

Adres: Morobe Printing and Supplies Ltd, PO Box 2555, Lae, Morobe Province.

Save laikim: Go lotu, raitim pas, pilai soka na tok pilai na amamas long lukim nupela pren.

Nem: Martha Bukasu

Krismas: 17 (meri)

Adres: Mercy Secondary School, PO Box 580, Wewak, East Sepik Province.

Save laikim: Pilai volibol na tok pilai.

Nem: Cynthia Marai

Krismas: 16 (meri)

Adres: Mercy Secondary School, PO Box 580, Wewak, East Sepik Province.

Save laikim: Pilai netbol, soka, tok pilai, harim musik na ritim ol buk.

Nem: Desley Mansu

Krismas: 15 (meri)

Adres: Mercy Secondary School, PO Box 580, Wewak, East Sepik Province.

Save laikim: Pilai volibol, tok pilai, raitim pas long ol pren na ritim buk.

Nem: Joel Soge

Krismas: 16 (man)

Adres: Yate Holy Trinity Community School, PO Box 69, lalibu, SHP.

Save laikim: Pilai basketbol, go lotu na mekim pren.

Nem: Rosa Kepu

Krismas: 16 (meri)

Adres: Yate Holy Trinity Community School, PO Box 69, lalibu, SHP.

Save laikim: Pilai basketbol, ritim buk, mekim pren na go lotu.

Nem: Lyn Assuma

Krismas: 15 (meri)

Adres: Yate Holy Trinity Community School, PO Box 69, lalibu, SHP.

Save laikim: Go long lotu na mitim nupela pren.

Nem: Francis Elia

Krismas: 16 (man)

Adres: Gabensis Primary School, PO Box 315, Lae, Morobe Province.

Save Laikim: Pilai volibol, ritim niuspepa, raun long bus, wokim gaden na skelim musik long FM na tu go long lotu.



STORI TUMBUNA

LONG bipo bipo tru wanpela meri wantaim man bilong em tupela i stap long wanpela ples ol i kolim Men. Tupela i stap longpela taim na dispela meri i nogat bel.

Bihain dispela meri i tingting planti long em i no karim wanpela pikinini i go i go na wanpela taim dispela meri i go long gaden bilong painim sampela kaikai. Em i wok long painim kaikai i stap na i harim wanpela perot i singaut antap long hul bilong wanpela diwai. Dispela perot i slip antap long kiau bilong en na i wok long singaut i stap.

Nau dispela meri i stat long wokim wanpela step poromanim as bilong dispela drai diwai. Bihain em i go antap long dispela diwai step em i go kamap klostu long maus bilong hul bilong diwai. Nau em i tingting planti bai mi holim o nogat. Bihain em tok sapos mi holim long han na i go daun bai kiau i bruk.

Olsem na em i ting sapos mi putim long maus em bai orait. Olsem na em putim long maus bilong em na i kam daun.


Em i kam klostu long graun na em i pundaun long graun. Long wankain taim, em i daunim kiau bilong perot. Em i go long ples na i stap longpela taim liklik. Bihain em i gat bel na i karim wanpela pikinini man nem bilong en Pel.

Tasol nus bilong en i sap olsem perot. Taim dispela pikinini i kamap bikpela liklik em man bilong kilim abus.

Wanpela taim bikpela singsing i kamap long wanpela ples ol i kolim Tar.

Nau man ya i tokim mama bilong en olsem em i laik i go singsing. Tasol mama bilong em i tokim em long givim kaikai long pik pastaim bihain em i ken i go long singsing.

Pikinini tanim kamap pisin



Taim dispela boi i stat long givim kaikai long pik aninit long haus, semtaim mama bilong en i stap antap long haus i karamapim em.

Taim mama i karamapim em skin bilong em i senis na i kamap olsem sua na i wankain olsem perot.

Man ya i kirap iusim dispela ples na i go long Tar, ples we singsing i stap long en. Em i stap long ples Tar na maritim wanpela meri long dispela hap.

Bihain ol i wokim bikpela kaikai long marit bilong tupela. Ol i kilim wanpela pik wantaim na Pel i katim.

Taim Pel i katim pik ol lain bilong en long sait perot ol i kam. Ol i wok long lukluk long Pel i katim pik i stap.

Nau ol lain bilong meri i tokim meri olsem yumi mas lukluk long man bilong

yu. Lukim ol pisin i kam na putim was long em i stap. Lukim pes bilong em na pes bilong ol pisin perot. Em i luk wankain yah.

Sapos em i givim pik long ol lain bilong em orait yumi mas rausim pik long em. Meri i lus tingting long wanem samting ol i tokim em.

Na aste yet Pel i givim pik long ol lain perot. Nau ol i luksave long em. Na papamama bilong em i kisim em na ol i flai i go pinis.

Pel i lus olgeta na nau yumi save ol perot i save karai na toktok olsem yumi.

**Abraham Kilitol
Bulolo Forestri Stesin
Morobe provins**

Mi gat hevi na mi laikim helpim

Dear Laiplain,

Mi save long dispela man long longpela taim liklik. Long fes taim mitupela i statim dispela pren pasin mi bin igat bel na mitupela wantaim i bin wanbel long mi rausim dispela bebi. Bihain long dispela em i tok olsem em i no laik lukim mi gen. Tasol sampela mun i pinis na em i ringim mi gen na askim mi long go lukim em. Taim mi bin go lukim em, mitupela i bin statim gen dispela prensip bilong mitupela.

Sampela taim mi save tingting long mi yet sapos mitupela i gat pilings bilong laikim wanpela na arapela namel long mitupela. Em i save ring na tok long lukim mi na wanpela taim mi bin tokim em long noken moa ring long mi.

Bihain long sampela mun i go pinis gen em i ring na askim mi watpo mi les long lukim em na mi givim em wanpela giaman toktok na mitupela i pren gen.

Em bin tokim mi olsem sampela taim em i save tingting long as watpo em i save ringim mi na mi save tok yes long em. Em i tok em i save lukim plan-



ti meri bikos em i ting ol meri i save yusim em tasol na askim sapos mi tu save yusim em.

Dispela i mekim mi paul olgeta bikos mitupela no bin tok 'Mi lavim yu' long wanpela na arapela. Sampela taim mi save laik tokim em dispela tripela wod tasol mi save stop gen. Mi yet no save ringim em tasol em yet i save laik ringim mi na toktok wantaim mi. Long dispela rilesensip bilong mipela yu ting i gat laik i stap namel long mitupela o em i yusim mi tasol?

LOST

Dia Pren,

Mi no kirap nogut long lukim olsem yu paul olgeta long dispela samting bikos narapela

man husat i gat wankain hevi bai i pilim olsem yu pilim. Yu wok long askim yu yet, 'trutru em i laikim mi o nogat?' na 'mi laikim em tu o nogat?'. dispela i ken paulim tru tingting bilong yu.

Ating sapos yumi lukluk long ol samting we i tru bai inap long helpim. Yu bin bungim dispela man na yu bin i gat bel. Man ya i bin tok wanem long dispela? Yu bin laikim long rausim dispela pikinini o em i tingting bilong man? Long pas bilong yu mipela i no inap long save sapos yu bin wari o yu no bin wari long rausim dispela pikinini. Yu no tokaut tu long hau yu pilim taim em i tok em i no laik lukim yu moa long dispela namba wan taim. Yu pilim olsem wanem long dispela?

Yu no bin harim long em long sampela mun na bihain em i ringim yu gen. Yu tok yu tupela stat pren gen long dispela taim tasol yu no tok sapos yupele i save lukim yupele yet planti taim o nogat. Long pas bilong yu i luk olsem yu tupela i no save bung planti taim. Yu bin tokim em long noken

ringim yu tasol em i ring na yu i go lukim em.

Yu statim rilesensip gen taim em i mekim klia olsem bai i nogat kaikai bilong dispela rilesensip tasol em i laik lukim yu klostu klostu. Em i tok gen olsem em i no laikim wanpela stedi rilesensip na i laik stap olsem pren tasol.

Em i ringim yu taim em i laikim tasol yu tok olsem yupele i wok long kam klostu long yutupele yet.

Long go klostu long wanpela man i min olsem yu save gut long em. Tingting long wanpela man o meri husat i klostu long yu olsem wanpela sista o brata o pren o tupela lain yu save husat yu ken tok i klostu long wanpela na arapela. Ating dispela ol lain bai save gut long pasin bilong arapela inap long trastim ol? Sapos wanpela bilong ol igat hevi yu ting bai ol inap sindaun toktok wantaim na stratim na ol i bai save long hau narapela bai i pilim.

Long tok 'mi lavim yu' i no min olsem dispela rilesensip bai i kamap strong quiktam. Nogat. - Laiplain

Buka i gat nupela studio

BOGENVIL klostu nau bai lukim kamap bilong wanpela nupela rekoding studio.

Aloysius Laukai
i raitim

Dispela nupela rekoding studio em bilong wanpela as ples kampani nau i stap wok long Buka Ailan.

Tambolema Trading Limited Studio nau i katim planti ol musik grup long Bogenvil na i kisim pinis sampela askim long rekodim ol musik bilong sampela musik man bilong Solomon Ailan.

Planti i kam singsing pinis na ol albam bilong ol i redi long pinis tasol i no rilis o kam aut yet inap long opisel open-

ing bilong dispela nupela studio long Buka.

Long dispela taim dispela studio i katim pinis tupela Gospel musik grup, em Tinputz Catholic Youth na Marai Pilgrims.

Studio tu i katim pinis wanpela string ben, em Suagu string ben long Tinputz.

Long sait bilong ol rok musik albam, Tambolema Studio i kati pinis wanpela albam bilong Lost Angels of

Nagovis, na tupela solo albam. Wanpela bilong Moses Kewokewo, wanpela manki Nagovis i skul long Gred 12 long Tarlena Sekenderi Skul long dispela yia, na Robert Sipo bilong Wakunai.

Long dispela taim we Bogenvil i klostu kisim otonomi we em bai kisim pawa bilong lukautim em yet, Tambolema Studio i luksave long dispela wok we inap kamap bihain na i wok long lukluk strong long promo-



• Antap-Solo musik atis bilong Wakunai, Robert Sipo i holim gita insait long rekoding studio. Albam bilong em i pinis na i redi tasol long rilisim.

tim na strongim musik stail bilong Bogenvil wantaim ol mambu flut o paip.

Olgeta rekoding bilong ol kaset na CD bai i kamap yet long opis bilong Tambolema Studios long Buka.

Sapos yu laik harim nupela kain stail musik bilong Bogenvil, baim kaset bilong Tambolema Studio long Buka.

Yu ken putim oda bilong yu long kisim ol kaset na CD tu. Bai yu mas rait i go long:

**RAPHAEL GINI
TAMBOLEMA TRADING LIMITED
P. O. BOX 46
BUKA
PAPUA NEW GUINEA**

Sapos yu i gat Email, yu ken salim email i go long: tambolema@daltron.com.pg

• Ol Suagu String Ben bilong Tinputz tu em ol arapela lain husat i rekod wantaim Tambolema studio. Nupela albam bilong ol i redi long rilis tu.

OL POTO: ALOYSIUS LAUKAI

**SEKIM TV LONG
DISPELA WIK.**

11.00PM - FONDE NAIT- WALKER TEXAS RANGER

DISPELA stail manki i kam bek pinis. Walker Texas Ranger, dispela kauboi husat i save kilim dai lam bilong ol man nogut bai kamap long olgeta Fonde nait long 11 kilok.



7.30PM - SANDE NAIT MUVI - NATIONAL LAMPOONS EUROPEAN VACATION

DISPELA muvi em wanpela pani piksa stret. Wanpela famili, nem bilong ol Griswald em ol lain we kain kain samting i save kamap long ol. Olgeta taim ol i save go malolo long wanpela arapela hap ol i save kisim taim long ol kain kain hevi. Nau ol i go raun long Yurop (Europe). Sapos yu laik lap indai, makim Sande nait na wetim dispela pani piksa.



11.00 PM - TUNDE NAIT - E.R.

OL MANMERI bilong wanpela imejensi haus sik long Amerika i save lukim planti kain kain manmeri i kisim olgeta kain hevi bilong sik. Bikpela wok bilong ol dispela wok manmeri em long sevim laip bilong ol manmeri i stap long ol bikpela birua o i kisim bikpela bagarap. Yu ken lukim ol long olgeta Tunde nait long 11 kilok long EMTV.



Wantok Niuspepa Kalaring Kompetisen Toksave

Yu mas kalarim dispela piksa long ol arapela pikinini bilong narapela kantri. Atis bilong mipela i helpim yu pinis na kalarim yangpela meri Saina. Nau em taim bilong yu long pinisim ol arapela piksa.

Taim yu pinis, raitim nem bilong yu, pos opis bokis adres bilong yu na krismas bilong yu na salim i kam long:

WANTOK NIUSPEPA
P. O. Box 1982
Boroko 111
NCD
Papua New Guinea

YUMI FM
Locked Bag 93
Port Moresby, NCD

Ol jas bilong *Wantok Niuspepa* na *Yumi FM* bai skelim sapos piksa i makim stret o i kam klostu long wanem piksa i makim. Yu bai gat sans long winim ol gutpela prais bilong yu long skul neks yia. Mama papa bilong yu i ken helpim yu long givim bekim long ol askim daun bilo.

Bihain long yu pinis, mipela i laikim helpim bilong yu. Plis givim bekim long ol dispela askim:

- Ples mama karim yu?
- Nau yu stap long wanem provins?
- Husat i baim niuspepa?
- Ol i baim niuspepa long wanem hap? (stua, maket, bas stop?)
- Yu laikim wanem samting insait long *Wantok Niuspepa*?

● *Wantok Niuspepa* i lukluk long statim wanpela pes bilong ol pikinini long neks yia. Nau mipela i laik save, yu laik lukim wanem samting insait long ol dispela pes bilong pikinini?

Lo bilong dispela resis:

- Yu mas aninit long 18 Krismas
- Yu yet i mas kalarim dispela piksa
- Yu ken yusim kala pensil o wanem samting wantaim naispela kala
- Yu mas katim na salim i kam long opis bilong *Wantok Niuspepa* na *Yumi FM* pastaim long Janueri 13, 2005.
- Bihain long yu kalarim dispela piksa, yu mas bekim ol askim antap bilong helpim *Wantok Niuspepa*.
- Yu i ken harim *YUMI FM* o lukim nem bilong yu long *WANTOK NIUSPEPA* long Janueri 20th, 2005 long laiv draw sapos yu win o nogat.
- *WANTOK* na *YUMI FM* yet bai glasim olgeta entri long dispela resis na makim ol wina.

UNIVERSAL CHILDREN'S DAY

HEY OL KALARENS KOMPETISEN pikinini!

Yu gat sans long winim wanpela SKUL BEG wantaim ol buk na pensil, ruler i stap insait na i kam long ...



...Na tu yu gat sans tu long winim moni bilong skul fi I KAM LONG...



So kamon ol pikinini, em de bilong yu pela "INTANESENEDEDEBIKONGNI OL PIKININI" Em de bilong mamasa ol pikinini ananit long 18 krismas i ken stap long dispela resis.



NEM.....KRISMAS.....

SKUL.....PLES:.....

ADRES:.....TELEPON:.....

.....

Ol winas bai ol i anaunsim long taim bilong laiv draw long YUMI FM na WANTOK NIUSPEPA long 20th Mun Janueri, 2005

Salim kalaring kompetisen i kam long:
WANTOK NIUSPEPA P.O.Box 1982, Boroko, NCD, Papua New Guinea

YUMI FM, Locked Bag 93, Port Moresby, NCD

Ol wokman bilong WANTOK NIUSPEPA



Bisnis bilong Groim Diwai insait long PNG - Yusim graun we i gat diwai long en

Wok bilong yusim graun i gat diwai long en

Narapela rot bilong yusim - Ol arapela wei bilong yusim graun

Ol tok stori i go pinis em mipela i lukluk long wok bilong yusim ol graun i gat diwai long en na lukautim diwai i mas stap yet. Tasol long planti kantri we i gat ol renfores, ol wok long rausim ol renfores long yusim graun bilong wok agrikalsa na maining. Dispela kain wok nau i kamap bikpela samting tru insait long ol tropikel kantri long wol.

Namba bilong ol arapela rot bilong yusim graun we i gat renfores long en i bikpela tru na i narakain long wan wan ples. Ol i save mekim dispela bilong sanapim haus, pulim rot, ol pawa lain, ol ples bilong mekim wok maining na ol wankain samting. Tasol bikpela resis tru bilong graun we i gat renfores long en i kam long agrikalsa.

Ol wok agrikalsa we i save kamap long graun we i gat renfores long en i no wankain olgeta taim. Bipo tru ol i save yusim sifting kaltivesen o pasin bilong senisim graun bilong gaden i go kam we ol manmeri i save sanapim ol haus bilong stap sotpela taim tasol. Ol i save katim diwai, kukim na planim gaden kaikai long wanpela hap inap long wanpela o tupela yia tasol inap olgeta gris insait long graun i pinis. Bihain ol i sruk i go long wanpela nupela eria na mekim wankain samting na lusim hap ol i lusim bai graun i ken kamapim nupela renfores o diwai. Dispela nau bai i ken givim bek gris bilong graun.

Wankain olsem sifting kaltivesen em bus falo sistem bilong agrikalsa. Long dispela kain wok agrikalsa, ol pipel i save sindaun na yusim ol nupela refores long givim bek gris long graun. Maski ol dispela kain setelmen bilong ol manmeri i liklik tasol, na taim bilong 'falo' em i longpela, i gat sans yet long strongim graun. Tasol sapos namba bilong ol manmeri long wanpela hap i gro, taim bilong 'falo' i go daun, graun i save lusim gris bilong em, na i save kamapim ol liklik eria we i gat gutpela graun. (olsem ol ples tais klostu long wara).

Long wok agrikalsa, ol dispela kain wok long graun i nogat strong long en bilong wanem graun i save sindaun nating inap longpela taim.

Mekim wok agrikalsa long longpela taim i mas bihainim sampela rot, olsem makim wok faming long hap graun we i gat planti gris, na graun we i save gat bikpela ren na we ren i ken karim ol hap graun antap bilong givim moa gris long en. Narapela rot em bilong yusim pekpek bilong kakaruk o ol arapela marasin bilong graun bilong groim gaden samting (olsem pinat) we i save givim bek gris long graun. (wankain olsem ol suga fam long Queensland, Australia na Ramu Sugar).

Ol gaden samting we i save givim gris long graun em ol dispela we i save makim ol netserel renfores we i gat planti diwai. Wanpela samting we i save stap long wok agrikalsa insait long ol tropikel kantri em bikpela namba bilong ol diwai krop olsem raba, kakao na wei pam. Long groim gut, ol dispela kain diwai inap long kamap gutpela sapos yu yusim marasin bilong graun long en. Tasol ol i no wankain olsem ol arapela gaden kaikai bilong wanem ol i ken gro na karim kaikai insait long renfores, maski graun i nogat inap gris long en. Olsem mipela i tok klia bipo, ol dispela kain krop em ol renfores plaua na ol i gat bikpela wok insait long ikonomi bilong planti kantri we i gat ol renfores.

Neks wik - I gat rot bilong skellim gut yusim bilong graun we i gat diwai long en long ol tropikel kantri?

McCARTHY & ASSOCIATES (FORESTRY) PTY. LTD.
National & International Forest Consultants
mccaf@detec.net.pg

"Long kisim tok stia long olgeta wok diwai"

Solwara bilong Saut Pasifik pulap long gol

WANPELA wokabaut painimaut bilong ol saintis i go aninit long dip solwara i painim aut olsem Saut Pasifik i pulap tru long ol kainkain mineral olsem gol, kopa na planti arapela we i stap klostu long ol volkano.

Ol i bin painimaut long dispela taim ol i yusim masin bilong go aninit long solwara o sapmarin we i ken go aninit tru long mak olsem 6500 mitas namel long Tonga na Fiji long wokim paini-

maut long ol volkano aninit long solwara.

Saintis bilong Japan Ken Takai i tokaut olsem dispela ol Pasifik ailan i pulap tru long mineral olsem gol.

Mista Takai i wok wantaim wanpela ejensi bilong Japan long stadi bilong laip long graun na solwara o Marine na Earth Saiens na teknologi husat i papa bilong dispela sapmarin

"Ol samting mipela i bungim aninit long solwara em bai mipela i kisim i go bek na wokim moa stadi long ol bikos mipela i ting bai mipela inap painim ol arapela mineral namel wantaim gol", em i tok.

Dispela ol ples ol i wokim wok painimaut em long hap bilong longpela lain volkenu insait long Pasifik rijon ol i save kolim Pasifik ring ov faia.

Green Peace laik stopim timba eksport bilong PNG

Desney Koimo i raitim

GREEN Peace i sponsarim wanpela wokabaut long Brisbane we ol i tokaut olsem ol lain i salim timba i go ausait long Papua Niugini we i no bihainim lo.

Green Peace nau i wok long traim long putim stop long eksport o wok bilong slim olgeta diwai o fores prodak insait long kantri. Dispela bai i lukim Papua Niugini i lusim bikpela mani olsem K100 millien we em i save kisim long timba taim kantri i salim long ovasis long wanpela yia. Dispela bai i lukim tu klostu long 4600 wokman i nogat wok.

Minista bilong Fores Patrick Pruaitch i kwestenim astingting bilong Green Peace bikos dispela bai bagarapim wok bilong mekim timba na ol arapela diwai prodak insait long kantri.

Em i tok Green Peace wantaim ol arapela intenesenel grup na Wol Benk i no bihainim stret lo bilong kantri we i stap aninit long Forestri Lo.

Long 1991 kam inap long nau olgeta timba pemit bilong ol timba operesen insait long kantri aninit long seksen 78 bilong Forestri Lo i bin surukim taim bilong ol.

Nogat man i bin kwestenim dispela samting inap Wol Benk i bin kam insait long sponsarim timba rivi o wok glasim long 2000 we i no bin lukim wanpela samting i rong long dispela lo. Tasol Wol Benk i laikim wanpela independan loya grup long lukluk i go insait long dispela samting.

Gavman i bin kisim tok klia

long Stet Solisita long dispela lo i stap long seksen 78 we i no bin lukim wanpela rong long en. Gavman i kisim tu tok klia long independan loya grup Gadens Loya tasol Wol Benk i no givim wanpela astingting long tok nogat long dispela tupela Lo tok klia we gavman i kisim.

Mista Pruaitch i tok Grinpis na ol arapela Intenesenel Envaromen grup i no bin kisim

gutpela toksave long karim aut dispela wokabaut bilong ol.

Em i tok sapos Green Peace i gat trupela samting bilong soim olsem salim bilong timba i wok long go ausait long kantri i no bihainim lo orait ol i mas stopim olgeta ol arapela somil na plai-wut fektori tu insait long kantri bikos olgeta i wok aninit long seksen 78 bilong Forestri Lo.

Iko Forest Progem gat ples insait long PNG

Desney Koimo i raitim

TUPELA man bilong Ingian i bin kam stap inait long kantri long las 4-pela wik long lukluk i go insait long wok bilong Iko Forestri Progem insait long kantri.

Dispela tupela man em Paul Lightfoot na Peter Massey husat i tupela independent konsalten wantaim save bilong forestri i tok ol i amamas long lukim wok bilong dispela progem i kamap gut insait long kantri.

Iko Forestri Progem i bilong sapatim ol grasrut na tupela i lukim olsem ol dispela lain i putim han long mekim wok.

Yuropien Yunien i putim mani long mekim wok i kamap long dispela Iko Forestri Progem bihain long Gavman i bin sainim wanpela mani agrimen long EFP long mun Mas bilong 2000 we tupela independen konsalten bai

long lukluk insait long ol projek.

Long wok painimaut bilong tupela we tupela i bin putim i go long Nesenel Forestri Sevis opis long Pot Mosbi i tokaut olsem ol i no lukim sampela samting tasol i gat ol gutpela we EFP i wok long mekim.


Dispela ripot ol i givim bihainim lukluk raun bilong ol long ol EFP projek insait long Lae, Kimbe, na Pot Mosbi. Ol arapela projek bilong EFP i stap tu long Madang, Westen na Sauten Hailans provins.

Dispela Iko Forestri Progem em ol i putim bilong kamapim gutpela sindaun o ikonomik welfea namel long ol pipel bilong Papua Niugini tru long komyuniti forest menesmen we i go daun long ples na pipel.

As bilong dispela projek i bilong helpim ol papagraun wantaim ol risos bilong bus bilong ol.

Cat® 'C' Series Hydraulic Excavators

305C, 307C,
308C, 311C,
312C, 314C,
315C, 318C,
320C, 322C,
325C, 330C



Caterpillar® 'C' Series Hydraulic Excavators incorporates innovations for improved performance and versatility.

- **Engines and Hydraulics** - Cat® engines combine with proven hydraulics to give consistently high power and control in the field.
- **Structures** - Rugged Caterpillar® undercarriage design and proven structural manufacturing techniques assure outstanding durability in the toughest applications.
- **Operator Stations** - Operator work stations are quiet with ergonomic control placement and convenient adjustments, low lever and pedal effort, ergonomic seat design and highly efficient ventilation.
- **Serviceability** - Longer service intervals and easier maintenance results in better machine availability and lower owning and operating costs.

Hastings Deering



PORT MORESBY
Phone: 300 8300
Fax: 325 0141

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAU
Phone: 982 1244
Fax: 982 1129

Tok pilai wantaim Kanage olgeta wik!!



Paps Kanage em bilong 40 Mail long Makham Veli, Lae; Morobe provins. Paps Kanage em wanpela daihat tru bilong watsim CD.

I gat wanpela treid stoa i stap klostu long 40 Mail treiding we i save soim CD olgeta nait. Paps Kanage em frant men bilong CD olgeta taim. Wanpela taim Paps bilong stoa i soim piksa bilong Rambo na Kanage em kism posisen pinis long fran stret klostu long skrin.

Olgeta man bisi long watsim i stap na i no long taim em lukim ol geng i kism retpela kar na hait long kilim Rambo.

Ol i kam klostu tru na i laik kilim Rambo stret em Paps Kanage kirap na singaut long Rambo, "He, Lambo! Lono we! Lono we! Or laskor i kam rong letpra kal ya na hait kam rong kirim yu! Lono we, Lambo! Lono we! Haliap ori kam krostu".

Taim Paps singaut yet em pairapim traipela kapupuk stret long pes bilong Junia Kanage.

Em nau Junia Kanage kirap

Ol tru tru poro o wantok bilong gutpela raitman Kanage i laikim tru sapos yupela i ken salim sampela tokpilai bilong yupela i kam na mipela putim long tok pilai kona bilong Kanage. Salim i kam long TOK PILAI KANAGE P.O. Box 1982, Boroko NCD o kam long opis klostu long BSP Waigani na neksdua long Mondo Sekanhan klos stua. Mipela stap long las opis. Sopotim raitman bilong yumi Kanage!!

askim Paps Kanage, "dedi em wanem, Lambo i bomim or laskor ah?" Na Kanage kirap na bekim na tok "Ye em bomim or rong nus birong geng rida slet".

Na Junia Kanage kirap na tokim Paps Kanage olsem "Em olsem na smel i kam stret long baksait birong yu na lono we go orosem rong hap". Paps Kanage kirap na tok, "He, Junia yu edlot, em flok birong wala i smel na pailap ya!" Man olgeta man i dai long tap na tek of wanwan long haus bilong ol

feet'. Bos i kirap na askim Kanage gen olsem 'dispela em bikman i dai o pikinini?'

Kanage i bekim 'Atus em i no bebi em wanpela traipela na longpela man ya'. Bos i tokim Kanage olsem 6 feet ya em bilong ol pikinini.

Nau Kanage i tingting i go nogat na em tokim Bos olsem 'sapos 6 feet i no inap orait wokim 10 mitas'. Man, Bos i kilim skin long lap pinis na tokim Kanage, 'Man i dai o kokonas i dai?'

**JAMES OMPERTH
MAKHAM
MOROBE PROVINS**

Kange em wanpela man Arowe long Wes Nu Briten provins. Wanpela taim kandere bilong Kanage i dai na ol famili i salim Kanage long go painim wanpela kofin.

Em Kanage i tekov i go long painim ol lain bilong wokim kofin. Em i go kamap long wanpela woksap na askim na ol lain long hap i tok em i orait bai ol i wokim kofin bilong Kanage.

Nau bos bilong woksap i kam na askim Kanage olsem 'Longpela bilong kofin bai hamas?' Em nau Kanage i kirap nogut na tingting i kilim em wansait i stap.

Em tingting i go i go na em kirap tokim bos bilong woksap olsem '6

**MICHAEL SAUTO
ERIMA
NCD**

Kanage i bilong Makam Veli yet na em i man bilong pasim retpela sotpela laplap. Wanpela taim em wantaim tambu man bilong em tupela i go kism dok na raun long bus.

Taim ol i kamap long bus em dok i ronim wanpela traipela pik, em tupela tit bilong em i krungut. Pik i go tanim long hap na i kam stret long Kanage wantaim tambu man.

Orait taimbu i lukim pik i kam na em i hariap tru ron i go na hangamap long han bilong diwai i stap. Kanage i tanim lukim tambu nogat olsem na em i givim siksti stret i go na pitpit i rausim retpela laplap bilong em na em i ron nating i go na hangamap wantaim tambu

long han bilong diwai i stap. Bihain tambu i tokim hei Kanage na laplap bilong yu we?

Man taim Kanage i lukluk long em yet, em i kalap i go daun na lek i kamautim as bilong olgeta kunai wantaim pitpit na em i go long kism laplap bilong em. Taim tambu i lukim olsem, man em i kaikaim tit na ai i pas antap long diwai.

**B. N. LUCAS
LAE
MOROBE PROVINS**

Kanage i bilong Makham veli long 40 Mail, Morobe provins. Wanpela taim wara Makham i tait na em i go wantaim ol mangi long swim na kism ol haphap diwai we wara i karim i kamdaun. I no long taim wanpela traipela palai i slip antap long wanpela sotpela diwai na tirip i kam.

Ol mangi i lukim na ol i resis long kism dispela hap diwai. Tasol hariap tru Kanage i go winim ol na i go holim dispela hap diwai. Palai i lukim olsem ya nogat em i putim tit long han bilong Kanage olsem na Kanage i singaut nogut tru na giaman long dai.

Orait ol mangi i wokim bet na slipim Kanage i go antap na ol i laik i kam long ples. Namel long rot ol bikman i paitim belo long lotu na ol mangi i ting olsem 'ating wan-

pela man i mas indai.' Ol i tok olsem na ol i tromoi Kanage wantaim bet i go daun long graun na olgeta i ranawe. Tai mol i ranawe em Kanage i no wet, em i kirap givim siksti na das i kam bihain olsem motobaik na i winim olgeta mangi na i go pas na sindaun long haus i stap. Olgeta mangi i go lukim em na ol i lap na kaikaim tit bilong ol.

**B.N. LUCAS
LAE
MOROBE PROVINS**

Kanage em i stap long Blu V-Last nambis kism kol win na rileks i stap. Na em bin laik raun i go long Kokopo Taun. Em waswas pinis na em kalap long bas rut namba wan 'Pangara' bilong Ralalar peles.

Em sindaun long baksait stret na bas i kukim kam long Kokopo, Rabaul Haiwe, Kanage rileks long bas.

Taim bas i stop long bastop boiros kalap. Ol bois askim em 'Turana yu kalap long wanem bas?'

Kanage presa kism em tu na em i kirap na tok, 'em ya bas ya Pagara ya, bilong Rararar ya!' Yupla tok pisin paol na ol pablik indai stret long lap.

**BRATA JEPHO IIV
RABAUL**

TOK PILAI wantaim KANAGE



SALIM OL TOK PILAI BILONG YU I KAM NA BAI MI PUTIM INSAIT LONG DISPELA PESI



WANPELA MANI DAI LONG PLES NA OL I SALIM KANAGE I GO BAIM KOFIN LONG TAUN...

KANAGE, YUGAT KAR, PLUS GO BAIM KOFIN LONG TAUN NA KARIM I KAM...

NO WARIS, BAI MI GO BAIM LONG TAUN NA KARIM I KAM...



NAU KANAGE WANTAIM KANDERE BILONG EM GO LONG TAUN...

HOLIM TAIT! MI LAIK BRUKIM REKOT BILONG ATING SENA! 350 MAILS PE AUA!!



OL I BAIM KOFIN PINIS NA OL I GOBEK... LIKLIK REN I KAMDAUN NA KANDERE I GO INSAIT LONG KOFIN LONG HAIT LONG REN...

OH-HO! REN I KAMDAUN...

MI GO INSAIT LONG KOFIN NA MI STAP DRAI!



LONG HAP ROT YET KANAGE I KISM SAMPela OL PASENDIA BILONG PLES KLOSTU... KANDERE SILIP INSAIT LONG KOFIN INO SAVE...


KALAP! PLANTI SPES.!!





NAU OL I GO... LONG HAP ROT YET KANDERE I APIM LID BILONG KOFIN LONG SEKIM SAPOS REN I PINIS... OL PASENDIA I LUKIM HANI KAMAUT LONG KOFIN NA OL I TING DAI MAN I KIRAP GEN...

AAAHH!

KAR I RON YET NA OLGETA I KALAP...



Wiken spot poto
wantaim Joe Ivaharia



Australia pret na win

INGLAN: PRET i mekim na ol Australia Kangaroo i winim Ingran 44-4 long fainol pilai bilong Trai-nesen siris.

Bipo long pilai Australia kosa Wayne Bennett i askim ol pilaia bilong em long tingim histori bilong Australia olsem em i namba wan long ragbi lig long dispela ol taim na lus bilong ol bai daunim dispela nem.

Long dispela taim em tokim ol pilaia em i tok Australia i no bin lus long wanpela siris ragbi lig pilai stat long 1959, long ol Lions long 1972 na long narapela ol kantri insait long ol ragbi lig fainol long 1978.

"Long ol laspela de Wayne i wok long toktok long histori bilong mipela na long ol taim Australia i bin winim ol (Ingran) long las 30 yia," Kangaroo senta Willie Tonga husat i tok bihain long em i putim tupela trai long win bilong ol.


"Em i tok i gat planti ol samting i stap na i no gutpela long lusim na bai nogut moa sapos mipela i namba wan lain long kusim (dispela nem) bihain long 30 yia. Planti ol manki i tingim dispela toktok olgeta taim long dispela wik.

"Taim yu liklik manki yu bin wok long tingting long dispela ol samting. Mi wok long pilai long nem bilong dispela ol pilaia husat mi lukim olsem ol i hiro bilong mi taim mi liklik manki. Em i narapela kain filing."

Bikpela samting em ol Australia i no laik long harim em long harim olsem ol bai lus tasol long wankain taim ol i no laik long harim olsem ol i gutpela long pilai.

"Olgeta ol ripota i wok long toktok long siris olsem em i bikpela samting na gutpela wei em Ingran i wok long winim mipela," huka na namba tu kepten Danny Buderus i tok.

"Na olsem mi ting yu wok long toktok yet long dispela. Dispela kain mak we Ingran i inap long winim mipela i kam klostu tasol mipela i win gen nau long nait (last Sande moning- PNG taim). Olgeta samting i go gut long taim bilong Ingran tasol nau long dispela nait mipela i kamapim histori bilong Australia gen.



• Danny McGuire (14) bilong Ingran i laik stopim Australia bikman Willie Mason long Trai-nesen siris fainol pilai las Sande. Australia win 44-4.

Hap bek Bret Kimmorley i tok mak bilong pilai i gutpela tru long pilai yet: "Long tok olsem dispela i no gutpela long futbol i rong. Mi ting em i gutpela samting long toktok taim yu toktok long (dispela) sait we i mekim olgeta samting i go orait tasol long 40 minit. Mipela bai tingim oltaim dispela nait."

Na ful bek Minicheiello i tok: "Strongpela tingting i save kamapim ol gutpela samting long ol pilaia na dispela em mipela i mekim long nau nait. Taim mipela i kam long kem long namba wan taim, Benny (Bennett) i tok i luk olsem mipela bai i no inap pilai gut long ol namba wan pilai bilong mipela na dispela

i tru inap long laspela ol wik em mipela i traim long pilai gut."

"Em i laikim mipela long kamap gutpela long wanwan ol dispela wik na ating wei mipela i pilai long namba wan 40 minit bilong dispela pilai i soim tru dispela tingting na i namba wan mak long dispela wokabaut bilong mipela long siris," Minichiello i tok.

Ol trai bilong Australia i kam long Minichiello 2, Willie Tonga 2, Matt Sing, Darren Lockyer na Willie Mason na ol poin i kam long Lockyer 6 na Craig Fitzgibbon 2. Trai bilong Ingran i kam long Stuart Reardon.

All Blacks bagarapim Frans

FRANNS: OL Frans i klinim sua bilong ol yet taim All Blacks i hamarim ol 45-6 long ragbi yunion Tes Mes long las Sande.

Dispela em i namba tri lus bilong ol bihain long gutpela rekod bilong ol long win i bagarap.

Na ol i no sem long tokaut olsem ol i no gutpela tumas long pilai wantaim dispela (All Blacks) tim.

"I gat tupela mak we mipela i lukim i winim mipela," Frans kosa Bernard Laporte i tok. "Mipela i no pilai long level ol i pilai long en."

"Mi wari long dispela na mi pilim nogut long ol pilaia, tasol long wankain taim mi amamas long ol wanem ol i givim olgeta samting em ol i gat long en."

"Mi no lukim wanpela tim husat strong bilong em i antap tru. Dispela em samting mipela i mas wok long em long redim mipela long 2007 wol sempionsip sapos mipela i laik pilai long sempionsip."

Frans i sempion bilong 2004 yuropian ragbi yunion we ol i winim 6 Nesen Gren Slam na ol i luk gut tu taim ol i winim Australia 27-14 long Paris tupela wik i go pinis.

Tasol ol i kam daun long graun gen taim ol i kisim bagarap long han bilong Argentina 14-24 las wik long Marseille.

Maski long dispela lus Laporte i pas yet long dispela sait we em i tokim ol pilaia bilong em olsem sapos ol i lus gen em bai lusim olgeta long tim na lus bilong ol long All Blacks i mas mekim bel bilong em i kaskas olgeta na olsem em bai go long tingting bilong rausim ol pilaia.

Na kepten bilong Laporte, Fabien Pelous i sapotim toktok bilong em na tok pilai bilong ol wantaim All Blacks i luk olsem "ol i pilai wantaim sampela kain strongpela samting."

"Ol (All Blacks) i stap long hap na ol narapela kantri i stap long hap. Mipela i pilim nogut long nogut long pilai wantaim ol. Ol i namba wan tim long pilai yunion long dispela taim."

"Mipela i gat tupela yia long passim dispela strong ol i gat namel long mipela bipo long Wol Kap i kam."

Laporte i tok sapos i gat ol gutpela pilaia husat i stap we em i no save long ol i moa gutpela ol man i mas toksave long em."

"Ol pilaia mi yusim nau nait i gutpela pilaia mi save mi kisim."

Bihain long dispela pilai ol Frans bai pilai wantaim Ingran na Ireland long dispela wiken na narapela wiken.

Tasol em i no inap lusim faiv-eit pilaia, Frederik Michalak, long kamapim gutpela pilai long Wol Kap.

Dispela 22-yia man em Laporte i mas askim em long go bek kisim hap bek ples taim ol i pilai wantaim Niu Silan. Na namba 10 pilaia, Julien Peyrelongue husat i kisim ples bilong em long faiv eit i no inap pilai gut long dispela ples.

Laporte i laik lukim olsem Frans bai mekim gut long 2007 Wol Kap.

Long ol narapela pilai Australia Wallabies i daunim Ingran 21-19, Ireland i stopim Argentina 21-19 na Saut Afrika i bagarapim sindaun bilong Skolen 45-10.

Pakistan laik winim Niu Silan

PERTH: PAKISTAN kriket kosa Bob Woolmer i gat hop long nupela tim bilong em olsem ol bai nekim ol Niu Silan long kriket pilai bilong ol narapela wik.

Foapela pilaia bilong pastaim tim husat i mekim wokabaut bilong ol long Australia long 1999 we ol i lus 3-0 siris i stap yet wantaim dispela nupela tim.

"Mi hop long mekim Australia i kirap nogut," he i tok bihain long ol i pundaun long Perth, Western Australia. "Mi ting olgeta i save mekim (dispela) kain long nau, yu ting wanem? Mipela i lukim olsem wokabaut bilong mipela nau bai wanpela hevipele wokabaut na mipela i lukluk tasol long dispela. Mi ting mipela i gat gutpela sait."

"Tasol i no orait tumas, tasol long narapela sait yu no save. Ol i gat sampela gutpela strong (long pilai) na ating nogut mipela i mekim sampela ol lain i kirap nogut."

Long dispela 17-man tim kepten Inzamman-ul-Haq, Yousuf Youhana, Abdur Razzaq na pesmen Shoaib Akhtar i bin pilai long Australia.

Na long narapela stori bilong kriket India i stop tasol long mekim 198 ron long tripela wiket.

Virender Sehwag i mekim 88 ron long dispela pilai bilong ol wantaim Saut Afrika long Saut Afrika yet.

Dispela em i namba tu pilai bilong fainol ol pilai bilong ol.

I gat wanpela pilai moa long painaut wina. Long dispela taim India pilai gut.

Chelsea pilai gut

LONDON: CHELSEA i pilai gut gen taim ol i nekim Charlton Atletik 4-0 long Ingran Prima Lig (soka).

Na Manchester United i wok long surukim yet win bilong taim ol i rausim Bromwich Albion 3-0 na Blackburn i lusim las ples na kam antap taim ol i autim tiket bilong Fulham 2-0 long las wiken pilai.

Sait bilong Jose Mourinho i kisim pen long han bilong Bolton long mekim dro long tupela wik i go pinis tasol i pilai gut gen wantaim Paris Saint-Germain na winim gen Arsenal namel long dispela taim.

"Mi amamas long kisim ol poin, mi amamas long kamapim dispela kain skoa, tim, tingting ol pilaia i gat long en na strong bilong mipela long pilai gut," Mourinho i tok.

"Mipela i gat 10 o 15 minit hevi long namba wan hap we mipela i mas tokaut olsem birua tim bilong mipela i pilai gut na dispela i bin givim ol sans long win."

"Tasol long namba tu hap mipela i pilai gut na lukautim gut pilai na mi bilip sapos mi no mekim ol senis na larim ol tripel ateka bilong mi i stap long bens mak bilong skoa ating bai go antap moa."

Na long pilai bilong United wantaim Bromwich kosa Alex Ferguson i tok em i laik tim bilong em i mas win yet inap long Niu Yia. Em i tok sapos ol i mekim olsem ol i gat sans long winim Ingran Lig taitol.

"Dispela em i namba wan pilai bilong mipela we mipela i pilai gut long olgeta 90 minit," Ferguson i tok. "(Paul) Scholes i namba wan pilai long wol na gol bilong em i namba wan."

"Bikpela samting em bilip long mipela yet i kam strong gen. Yu no save wanem taim em bai go na yu no save wanem taim em bai kam bek tasol kamapim sampela ol win i mekim bikpela senis."

Na ol Blackburn Rovers i stat long soim strong bilong ol taim ol i nekim Fulham 2-0 long Craven Kotes.

Tupela gol bilong ol i kam long straik bilong Paul Gallagher na penalti kik bilong Paul Dickov we i helpim ol long lusim las ples i kam antap.

"Namba wan 45 minit i taim we mi ken tingim olsem em i rabis taim bilong mi stret long taim mi lukautim Fulham," kosa Chris Coleman i tok. "Wei ol i yusim bodi bilong ol i no gutpela tumas. Na ol gutpela pilaia bilong mipela i no kamapim wanpela gutpela pilai long taim ol i kisim bal. I luk olsem ol i stap long nambis bilong Rio, katap i go i kam."

Couples winim Golf

LA QUINTA, Kalifornia: FRED Couples i winim pastaim wol golf sempion Tigers Woods long golf tonamen ol i holim long makim Tenksgiving de long La Quinta, Amerika.

Wantaim tropi Couples i winim tu US\$640,000 (K2.5 milien) prais mani na Woods i winim US\$340,000.

Tupela man ya wantaim ol narapela pilaia i pilai long foa pilai-ov.

"Mi amamas olsem mi kisim 'king ov skin' long sampela moa hul," Woods i tok. "Mi mekim em i wok hat."

Couples i winim olgeta mani bilong em long Sande (Mande PNG taim) we em i stat wantaim birdie putt we prais mani bilong em em US\$300,000 na 8pela skin long namba wan hul. Em i pilai i go moa yet na winim tonamen we Woods i ti-ov taim bal bilong em i plai i go insait long wara, long pa-3, 204-yad 17 long Trilogy Golf Klub.

Couples, 45, i winim rekod US\$3,515,000 na 77 skin insait 11-pela pilaia em i kamap long ol.

"Em i switpela de bilong mi," Couples i tok.

"Taim mi kam hia mi no tingting long win, mi tingting tasol long pilai na tingting long mekim sampela gutpela sot," em i tok. "Mi mekim long sampela de na mi winim planti skin, na ol (win) i kamap tasol."

Couples husat i kisim bagarap long baksait bilong em bihain long em i mekim 15 win na i no longtaim winim PGA tua long Houston Open, i harim olsem ol man i tok baksait long em olsem strong bilong em long pilai gut i wok long go daun.

"I laikim tru long lus nau na go winim Los Angeles Open," 1992 Mastas Open i tok. "Mi mas tok tru long yu. Em i hat long mekim. Em i hat long pilai long foa raun tasol em mak mi makim. Mak bilong mi em long win gen."

Long dispela pilai Woods i wok long painim hat long yusim pata bilong em. Sampela man i tok em i wok long lusim gutpela wei bilong em long pilai.

Andrew Molen
i stori long
wanem samting
i kamap long
Isten Papua
soka tonamen.

Isten Papua soka bungim Milne Be pipel

I GAT as bilong ol manmeri i save kamapim ol grup. Em sapos dispela grup i bisnis grup, politiks o sosel olgeta i gat as tingting long kamap na stap olsem.

Planti taim as tingting bilong kamap bilong dispela ol grup em long luksave long husat i gat wankain tingting long kam bung na mekim wok o amamas na stap wantaim.

Dispela i no hat taim EPC o Isten Papua Kanivol i kamap long Pot Mosbi.

EPC em i soka pilai o tonamen we i kamap bilong bungim ol pipel bilong Milne Be provins. Na olsem taim ol manmeri i pilai ol i kam luksave long ol yet. Na we i gat hevi o wok i kamap ol pipel i kam bung long givim helpim.

Tasol taim ol i mekim olsem long wankain taim ol i promotim na strongim soka namel long ol yet.

Na tru tumas dispela tonamen i

mas bilong ol i stap namel long 17-23.

Dispela kompetisen i kirap long tingting bilong John Liosi na taim ol narapela bikman bilong Milne Be i lukim gutpela bilong dispela tingting, ol i statim long 1979 na nau i kamap strong tru.

I no ol lain i stap long Pot Mosbi tasol i save pilai, sampela tim bilong ples tu i save kamap na traim save na skil bilong ol wantaim ol manki bilong taun. Dispela yia wampela tim tasol, Gomwa-Begasi (GB) bilong Fergusson ailan i kamap.

Sampela gutpela pilaia em ol klab long Pot Mosbi i save salim tok, baim tiket na su bilong ol na ol i save kam long pilai tasol na bihain go bek gen. Dispela wankain ailan i salim tupela tim i kam bipo, Salamo long 2002 na Walam long 2003 na nau wampela ken i kam. Mi askim ol narapela klab



• Isten Papua soka tonamen i save kamap strong na bikpela olgeta yia. Hia manmeri i givim sapot. Ol foto: JOE IVAHARIA

mekim gut strongim dispela kod.

Na i luk olsem sampela ol gutpela pilaia i kamap pinis long kain kompetisen. Ol pilaia olsem Paulo Patterson bilong ANZ University na Andrew na Nathaniel Lepani bilong Cosmos long Pot Mosbi soka kompetisen.

Pastaim ol manmeri long Milne Be i no planti na olsem ol oganaisa i askim ol tim bilong Noten na Isten Sentrol provins long go pilai wantaim ol. Tasol bihain taim planti manmeri long Milne Be i stap long Pot Mosbi ol oganaisa i lusim dispela tupela hap na larim ol tim bilong Milne Be tasol i pilai.

Tasol i gat tok orait long ol man i marit long Milne Be long pilai long dispela tonamen tu.

Sampela bilong dispela ol man em olsem Ben Lakasa olsem Batman Furigi, Enoch Abraham na Taku Niebo.

Hia EPC presiden Aggrie Watson husat i stap presiden stat long 2001 i stori liklik long kamap bilong kanivol:

Mipela i lukluk long developim ol yangpela bilong mipela husat kris-

insait long siti long helpim ol na lukiuk long stap na pilai bilong ol bipo long ol i go bek.

Taim ol pipel i kam long dispela bung ol i no kam long lukim gem na pilai tasol, nogat, ol karim kalsa na wanwan pasin bilong ol.

Ol kamap spirit bilong wanbel, wok-bung na amamas.

I nogat bikpela pait na kros i save kamap long taim bilong pilai. Sapos i gat hevi mipela i stretim long wei bilong mipela yet, Milne Be wei.

Mipela i hop dispela kanivol i go het long ol taim bihain.

Hevi em mipela i gat long en em mipela i nogat sponsa.

Planti hatwok em mipela yet i save mekim.

Long 1998 Orogen Minerol i kamap olsem meja sponsa bilong tonamen tasol bihain long em i pinis i nogat narapela kampani i kam long helpim mipela.

Sir Mekere Morauta i bin givim K10 000 helpim long mipela long 2001 na mipela i wok long yusim dispela mani tasol olgeta yia i kam.



• Lukaut meri nogut i laik traim abrusim birua pilaia bilong em long EPC long Bisini soka graun. Bai i orait o nogat?

Tasol maski long dispela ol wining tim i save kisim gutpela prais.

Totol prais mani bilong dispela yia em K12 000 we ol i brukim i go daun long wanwan level bilong gem.

Totol prais mani bilong ol pilai em namba wan top foa tim bilong ol man inap olsem K5 500 na namba wan tim o wina bai kisim tu EPC kap. Totol bilong ol meri em K3 750 wantaim Bukoya Kap i go long sempion bilong ol.


Long maina kap salens tripela tim bilong ol man bai pait long Ila Ilaitia

Kap na totel prais mani long ol i stap long K600.

Ol meri bai resis long Don Sigimata Kap na wankain prais mani olsem bilong ol man bai i bruk namel long ol tu. Na i gat ol narapela prais tu bilong ol man husat i putim planti gol, bes na feares pilaia.

Ol oganaisa i laik lukim olsem olgeta manmeri i amamas long pilai.

Husat i laik helpim dispela tonamen i ken ringim mi long mobail telepon namba 687 1751. Mipela bai amamas long wok bung wantaim yu.



• Klia! Ating em samting dispela meri i tok taim em i rausim bai long gol eria bilong em long EPC. Dispela kain i strongim soka.

Dolphins winim Buka soka

Aloysius Laukai i raitim

BOUGAINVILLE sempions soka klab long wiken i soim olsem em i stap namba wan yet taim em i winim Puan soka klab gren fainol long Pororan Ailan long Wes Buka.

Dolphin soka klab i winim Michael Ogio sil taim em i autim tiket bilong Hatolol 2-0 long pilai bilong tupela.

Tasol dispela win i no kam isi. Nogat Dolphin i mas pait hat long kisim.

Long stat bilong pilai Hatolol i go pas wantaim 2-0 skoa long hap taim. Tasol bihain long malolol ol manki Dolphins i kisim gutpela mekimsave long maus bilong kosa we ol i go insait pilai strong long skoa 2-2 taim fainol wisel i kamap.

Dispela skoa i mekim na tupela tim i kisim narapela moa 10pela minit long painimaut husat tru em i sempion.

Dispel i mekim na ol manki nogut bilong Dolphins i traim hat yet tasol nogat. Tupela sait wantaim i strong.

Olsem na tupela tim i mekim sut aut we Dolphins i skorim 6-pela kol na Hatolo i putim tasol 5-pela gol.

Dolphins klab i klab bilong longtaim yet we dispela yia ol i selebretim 24-yia bilong ol.



• Dolphin (kala) i pilai wantaim Hatolo long Buka soka gren fainol.

Narapela yia ol i laikim amamasim 25-yia silva jubili selebresen bilong ol.

Dispela klab long taim em i stap i bin winim planti ol provinsol sempionsip na i save makim provins long ol nesenel iven. Long 2000 na 2001 em i bin makim

Bougainville long nesenel soka taitol long Lae na Kimbe.

Long dispela yia ol i kamap sempion bilong Bougainville gen taim provins i holim sempionsip bilong em long Arawa long Septemba 16.

NCDPS soka i stat



• Sampela soka eksen long Bisini graun.

Joe Ivaharia i raitim

NESENEL Kapitool Distrik Pablik Sevens soka resis i bin stat tupela wik i go pinis na nau i wok long kirapim das gen.

Ol pilai i kamap long Sir John Guise Stadium long Sarere na Sande we planti ol pablik seven manmeri na ol pikinini i go long pilai na lukim.

Aninit long lukaut bilong presiden Simon Koima na ol eksekutiv bilong em dispela ol gems em bilong mekim ol wok manmeri i stap fit na hetti na long wankan taim luksave na poromanim ol yet long pilai spot na tu long wok.

I gat narapela wankain kompetisen long Lae tasol nau yet ol i no stretim ol samting long pilai.

Bihain namel long kompetisen bai i gat wanpela pilai namel long ol pablik seven bilong tupela senta Mosbi na Lae we bai i kamap long wanpela bilong tupela senta ol bai tok aut long en long bihain taim, Koima i tok.

Koima i tok tu olsem olgeta tim i mas registerim ol pilai bilong ol hariap na baim afiliesen fi tu we pinis de bilong baim olgeta samting em long narapela wik. Bihainim pinis bilong pri-sisen gems we i bin stap long tupela wik ol fainol i kamap long las wiken we i lukim tupela tim bilong B-Mobile soka klap i bin winim.

Long gem bilong ol meri B-Mobile i bin winim Waterboard 3-1 long penalti kik bihain long skoa bilong tupela tim i bin pas 1-1 long ful taim.

Na long fainol bilong ol man straika bilong B-Mobile Timothy Salaiu i bin pairapim umben bilong RPNGC long skoa na mekim tim bilong em i kisim K1000 na winim pre -sisen taitol.

Ol meri B-Mobile tu i kisim K1000 prais mani Bihainim pre-sisen fainol dispela wiken bai i lukim kompetisen pilai i stat.

Ol pilai i no stat hariap bikos long hevi bilong mani na olsem ol opisa i statim nau tasol.

Skulboi ragbi go long fainol

Andrew Molen na Maisan Pahun i raitim

SKULBOIS ragbi lig i gat longpela rot yet long i go bipo long ol manki i kamap ol gutpela pilai stret na helpim kantri long i kamap wanpela strongpela ples bilong lig.

Dispela em i as tingting siaman bilong skulbois ragbi lig long Pot Mosbi Iffysoe Segeyaro i wokim las wik. "Long sait bilong pilai em i orait bilong wanem ol save i pilai gut tru na nau ol gem i kamap long fainol na mi amamas tasol i gat planti samting yet i stap long helpim ol pilai long save gut long ragbi lig," Segeyaro i tok.

"Planti samting long sait bilong gem ol i save tasol ol skills bilong ol tasol i mas i go antap."

Em i tok i mas i gat kain ol samting olsem ol kosin klinik na spesol trening kemp, long helpim ol sumatin long save gut long gem.

"Planti save bilong ol long gem em ol i lainim long lukim long T.V," em i tok.

Long wankain taim em i tokim Wantok niusepepa olsem em i no amamas long ol sinia pilai long ol i no lukluk na tingting long helpim ol liklik.

"Mi i no amamas long ol, ol i kisim biknem nating na ol i no laik yusim save bilong ol long helpim ol liklik bilong ol," Segeyaro i tok.

"Mipela i nidim sampela voluntia long kam helpim," Segeyaro i tok.

"Ol kain lain olsem ol sinia pilai na ol kosa i mas putim han long helpim ol manki na dispela bai i nap long helpim na divetopim gem long kantri."

Tasol em i tok levof bilong gem nau i antap moa long bipo taim dispela kompetisen i bin stap.

Segeyaro husait i wanpela Kumul bipo i tok wanpela we long stretim na helpim ron bilong gem em ol skul yet i mas redim ol yet gut bipo long kompetisen i stat bai ol i ken stat hariap na i nogat samting bai stopim ron bilong gem.

Em i tok ol i noken wetim ol ofisols long wokim olgeta samting bilong wanem i nogat i nap man long wokim wok.

Em i tok taim ol i bin kirapim dispela kompetisen bek gen bihain long

em i go hait sampela yia, i bin gat bikpela wok tru i kamap wantaim.

"Mipela i kisim tok orait long ol mamapapa bilong ol manki, lukim ol woklain long haus sik na tu painim ol man long wok olsem ol ofisols," Segeyaro i tok.

"Bipo dispela kompetisen i stap aninit long karikulam o was bilong skul olsem na ol samting i isi tasol long ronim.

"Nau mipela yet i ogenaisim long sait olsem na i hatwok liklik," em i tok.

Tasol Segeyaro i tok neks yia bai dispela kompetisen i kamap bikpela moa.

Long anda 12 Tokarara praimer skul bai saiensim Morata praimer skul. Na long anda 14 St Francis bai pilaimol mangi Hohola praimer skul. Dispela bai i wanpela strongpela gem bihain long Tokara i bin rausim Philip Aravure 6-0 long semi fainol las wik. Morrata tu i dastim ol St Francis 12-6 long kam insait long dispela fainol

Long dispela junia divisen planti sapota em skul sumatin we singaut na wisif bilong ol i save pulapim PRL stret. Kain sapot bilong ol na sapos yu raun long Boroko long sande bai yu ting ol Australia kangaroo kam pilai long PRL na ol man singaut i stap.

Ol sumatin long anda 16 bai lukim ol gerehu mangi Philip Aravura Praimer skul salensim Koki praimer skul. Dispela bai i wanpela strongpela gem stret bikos long kam insait long dispela grenfainol tupela tim i bin pilai strong tru wantaim ol narapela tim na bin winim ol.

Kwikila Hai Skul bai pilaim Kila kila Hai Skul long anda 18 gren fainol. Dispela tupela tim i strongpela tim we i save kamapim strongpela pilai insait long anda 18 kompetisen. Las wiken Kwikila i bin winim larowari hai skul 20-6. Na ol Kilakila i winim ol Badihagwa hai skul 6-0. Dispela i bin lukim tupela tim nau bai go insait long dis wiken gren fainol.

Long anda 12 i go inap long anda 18 bai lukim olgeta skul sumatin, papamama na ol Ragbi lig sapota kam sapotim skul bilong ol. Dispela yia planti praimer skul, sekenderi hai skul na hai skulinsait long Mosbi siti na Sentral provins.

EPC go insait long nokaut

Andrew Molen i raitim

EPC soka tonamen bai i go insait long nokaut bilong ol long dispela wiken na ol top tri tim long wanwan pul i soim strong na tingting bilong ol ples kila pinis.

Pom Oyyabia, Badili United na Galea 2 long pul A, Yabwau, Ebony Woods na Gala Kakau long pul B, Difening sempion Simla 1, Galea 1 na Nim long pul C, na Gabutu, Giyovaka na Mixmates i soim inters bilong ol long pilai bilong ol long gem bilong ol man.

Gabutu, Fernor na Mixmates i lukautim pul B bilong ol meri na Nim, LSC na Galea i putim ai long pul B.

"Olgeta samting i ron gut na i luk olsem bihain long ol nokaut long Sarere em olgeta samting i redi tasol long gren fainol long Sande," tonamen dairekta, Simon Dobin i tok.

Bihain long nokaut long Sarere ol top foa tim bilong ol man bai mekim save long EPC (meja) kap na foapela i kam bihain long ol bai pilai long maina kap.

Long wanpela gem bilong pul C bilong ol man i lukim Galea 1 na Nim i brukim bun long lukim husait bai i nap long kisim presas bilong nokaut na fainol dispela wiken.

Nim i kam strong long fes hap tasol ol i no i nap long bol wok bilong Galea we i lukim ol i putim tupela gol hariap long fes hap na difen long seken hap long winim gem 2-0.

Fowet bilong Galea Tominde Niebo i giamanim goli bilong Nim na kikim wanpela isi gol i go long sait bilong net na i nap olsem 10 faiv minit bihain Scotty Retu i hetim wapela naispela kik i kam long kona i go insait long sem kona Niebo i putim.

Nim i kam traim long skoa tasol ol bal bilong ol i no painim gol.

Long seken hap ol i pasim banis bilong tasol i nap long laspela wisol.

Malangan kamapim gutpela pilai

WANPELA strongpela sofbol gem i kamap namel long Malagan na Kopex long raun wan primia divisen pilai bilong ol man long Sande insait long Pot Mosbi.

Malagan i strongim pilai bilong ol we i lukim ol i go pas planti taim insait long gem we i lukim ol i win 6-5.

Tasol ol manki Kopex tu i strongim sait bilong ol wankain na klostu ol i kam long baksait na win long laspela ining we ol i stap 6-4 tasol wanpela ran tasol i kisim ol i go wan poin klostu long Malagan tasol narapela pilai bilong ol i aut na gem i pinis.

Ol beta bilong Kopex i traim tu long paiti sampela hom-ran tasol pita bilong Malagan, Samuel Ropa i no givim sans long ol.

Planti bal ol beta bilong Kopex i save paitim bal tasol ampaia i save tok faul o straik na dispela em we planti i aut.

Ol filda bilong Malagan tu i was gt long fil na ol i autim blanti Kopex taim ol i ketsim ol bal ol i paitim i go antap tasol ol filda bilong Kopex i no was gut tumas we planti bal i go long ted bes i save pudaun.

Ol lain i skoaim ol ran bilong Malagan em Tul Malisa, Glen Nigins, Jacob Nigins, Karl Sangul, Gary Mari na Teina Tamarua.

Allan Gia, John Bolton, Sioni Turlom, Daniel Wartovo na Charlie Horris i kisim ol pions bilong Kopex.


Long ol arapela gem Bears i kaikaim Brown Eagles 2-1 na Manolos i ronowe na givim das long Gazelle 18-0.



• Chebu pilai i traim hat long winim bes.



WANTOK Spots



Skul manki lainim ragbi

Paul Zuvani i raitim

LONG 2005 skul yia ol skul manki bai stat lainim ragbi lig olsem ol i lainim inglis na met.

Sapos olgeta samting i ron gut dispela program bai stat long Mas.

Papua Niugini Ragbi Futbol Lig jenerol menesa Joe Tokam i tok dispela toktok wantaim ol arapela samting ol i paitim toktok long en i kamap long PNGRFL bod miting long Lae long las wik Sarere.

Em i tok PNGRFL bai givim dispela program long pinis bilong dispela wik o narapela wik i go long opis bilong PNG Spot Komisen na Edukesen Dipatmen long glasim sapos program i orait long ol i bihainim.

Em i tok dispela tingting i kamap bihain long Melbourne Storm Ragbi Lig Klub developmen opisa, Peter Bevan, husat i wok tu wantaim Australia Ragbi Lig (ARL) i mekim sampela wok painimaut long developim ragbi lig long kantri long sampela taim stat long dispela yia. Dispela wok painimaut i kamap bihainim askim bilong PNGRFL opis. Na olsem planti ol samting em bod i toktok long kibung em ol tingting bilong Peter Bevan.

Em i tok PNGRFL bai traim dispela program pastaim long ol skul long NCD, Lae, Goroka na Kokopo. Na sapos program i ron gut opis bai surukim i go long ol narapela senta na provins.

"Mipela laik lukim olsem ragbi i stap long blut bilong ol manki. I olsem ol i save wanem samting em i ragbi. Ol i no ken lain moa sapos ol i kamap bikpela na lain ken long samting ol i mas save pinis," Tokam i tok.

Na long mekim olgeta samting i kamap gut, em i tok PNGRFL bai kamap wantaim program we bai go wantaim Edukesen Dipatmen we bai lukim ol skul tisa bai lainim ol samting bilong ragbi lig long fainel yia bilong ol.

"Ol skul tisa long las yia bilong ol long koles bai lainim ragbi lig na ol pasin bilong em olsem kosa, administreta, trena na ol arapela samting.

"Mipela bai askim ol papaman tu long stap insait long dispela program. Ol papamama bai kamap olsem ol wasmanmeri.

Em i tok moa olsem wok bilong PNGRFL developmen opisa em opis i edvetaisim pinis na planti man i salim apilikesen bilong ol i go long kisim wok. PNGRFL bai makim dispela opisa liklik taim. Dispela opisa em Australia Ragbi Lig opis bai lukautim.

Long ol skul manki i pilai ragbi lig Pot Mosbi i statim pinis dispela kompetisen long 2004 aninit long lukaut bilong Iffysoe Segeyaro.

Segeyaro i bipo Kumul pilai na em i statim dispela kompetisen long promotim ragbi lig.

Long ol narapela toktok PNGRFL bai lukim PNG Nesenel Ragbi Kompetisen (PNGNRC) i stat long Epriel, 2005.

Dispela PNGNRC i wankain olsem pastaim SP Inta-siti kompetisen tasol i bai kamap aninit long nupela nem long dispela taim.



Kila Kila winga (no 2) i putim was long larowari pilaia husat i laik karim bal kam aut long trai lain bilong em long Pot Mosbi Skulboi ragbi lig resis. Kila Kila win 12-4. Foto JOE IVAHARIA

"Dispela Papua Niugini Nesenel Ragbi Kompetisen bai i kamap narapela bodi long opis bilong PNGRFL. Tasol em bai stap aninit long lo bilong PNGRFL," Tokam i tok.

"Eitpela o naipela tim bai stap insait long dispela kompetisen.

Dispela ol tim Tokam i tok em tupela long Pot Mosbi, wanpela long Lae, Goroka, Rabaul, Kundiawa, Mt Hagen, Wabag na Mendi.

Na ol bai pilai long Pot Mosbi, Lae, Goroka na Kokopo tasol.

SP Brewery bai sponsa bilong PNGNRC na wanwan ol

tim bai gat ol kampani i sponsorim ol. Sponsasim bai stap tripela yia olgeta.

Long narapela nius het opis bilong PNGRFL i muv long Goroka na go daun long Lae long sampela taim long dispela wik na wanwan ol rijinot opis bai stap long Pot Mosbi, Goroka na Kokopo.

PNGRFL bihainim tingting bilong Peter Bevan i gat plen long kamapim ragbi lig ekedemi long Lae long sampela taim long 2006 o 2007. Na ekedemi bai stap long Goroka.

Planti ol developmen wok em PNGRFL bai kisim helpim long ARL na sampela opisa bilong ol bai wok tu hia.

SPEND K50 AT BRIAN BELL AND GO INTO THE DRAW TO

WIN A KIW HOME

& K6,000 BRIAN BELL SHOPPING VOUCHER

Brian Bell **BB**
Shop with a friend

6 WEEKLY SHARP PRIZES TO BE WON!

MAJOR DRAW DECEMBER 23rd 2004



KWIKBUILT LOW COST KIT HOME
KB2-35 LOWSET 2 BEDROOM HOUSE